



# SLUŽBENI GLASNIK OPĆINE KALESIJA

Godina: XXVIII

Ponedjeljak, 28.02.2005. godine  
K A L E S I J A

Broj: 2

## OPĆINSKO VIJEĆE

### 14

Na osnovu člana 41. Statuta općine Kalesija ("Sl. glasnik općine Kalesija", broj 7/03), člana 20. Poslovnika o radu Općinskog vijeća («Sl. glasnik općine Kalesija», broj 2/04), Općinsko vijeće Kalesija, na sjednici od 28.02.2005. godine, d o n o s i

#### ODLUKU

o razrješenju i izboru člana radnog tijela  
Općinskog vijeća

I

Razrješava se dužnosti člana Komisije statutna pitanja i propise Općinskog vijeća **Huseinović Hajrudin iz Donjih Rainaca**, na lični zahtjev.

Na upražnjeno mjesto u Komisiju za statutarna pitanja i propise Općinskog vijeća imenuje se **Mešić Izet iz Tojšića**.

II

Ova Odluka stupa na snagu danom objavljivanja u «Službenom glasniku općine Kalesija».

Bosna i Hercegovina  
Federacija Bosne i Hercegovine  
TUZLANSKI KANTON  
OPĆINA KALESIJA  
OPĆINSKO VIJEĆE  
Broj: 01-05-2-595  
Datum, 28.02.2005. godine

PREDSJEDAVAJUĆI  
OPĆINSKOG VIJEĆA

Hata Mujčinović, dipl. ing. tehn.s.r.

### 15

Na osnovu člana 77. stav 1. Ustava Tuzlanskog kantona ("Sl. novine TPK" br. 7/97, 3/99, i "Sl. novine TK" br. 13/99 i 10/00),

člana 70. Zakona o kantonalnoj upravi ("Sl. novine TPK" br. 1/99 i 2/99), člana 36. Zakona o lokalnoj samoupravi ("Sl. novine TPK" br. 6/98 i "Sl. novine TK" br. 13/99 i 7/02) i člana 41. Statuta općine Kalesija ("Sl. glasnik općine Kalesija" br. 7/03), Općinsko vijeće Kalesija, na sjednici od 28.02.2005. godine, d o n o s i

#### ODLUKU

o izmjenama i dopunama Odluke organizaciji  
općinskih službi za upravu

Član 1.

U Odluci o organizaciji općinskih službi za upravu («Sl. glasnik općine Kalesija» br. 1/03 i 2/04) u članu 10. stav 3 mijenja se i glasi:  
«Rukovodeći službenici iz prethodnog stava su Sekretar Općine i pomoćnici Općinskog načelnika».

Stav 5 istog člana se briše.

Član 2.

U članu 12. stav 1 mijenja se i glasi:  
«Rukovodeće službenike postavlja Općinski načelnik, na način i u postupku koji je propisan Zakonom o državnoj službi».

Stav 2 istog člana se briše.

Član 3.

Ova Odluka stupa na snagu danom objavljivanja u «Službenom glasniku općine Kalesija».

Bosna i Hercegovina  
Federacija Bosne i Hercegovine  
TUZLANSKI KANTON  
OPĆINA KALESIJA  
OPĆINSKO VIJEĆE  
Broj: 01-05-2-596  
Datum, 28.02.2005. godine

PREDSJEDAVAJUĆI  
OPĆINSKOG VIJEĆA

Hata Mujčinović, dipl. ing. tehn.s.r.

## 16

Na osnovu člana 29. Zakona o lokalnoj samoupravi ("Sl. novine TPK" br: 6/98 i "Sl. novine TK" br: 13/99 i 7/02), člana 41. Statuta općine Kalesija ("Sl. glasnik općine Kalesija", broj: 7/03), Općinsko vijeće Kalesija, na sjednici od 28.02.2005. godine, d o n o s i

### ODLUKU

o općinskim administrativnim taksama

#### Član 1.

Ovom Odlukom utvrđuju se administrativne takse koje se plaćaju za spise i radnje u upravnim stvarima kao i za druge predmete i radnje kod organa uprave općine Kalesija.

#### Član 2.

Spisi i radnje za koje se plaća administrativna taksa, utvrđuje se

### TARIFA

općinskih administrativnih taksa

#### I Podnesci

##### Tarifni broj 1.

- Za zahtjeve, molbe i prijedloge i druge podneske ako ovom tarifom nije propisana druga taksa plaća se ..... 5 KM
- Napomena: Taksa po ovom tarifnom broju ne plaća se za naknadne podneske kojima stranka zahtjeva samo brže postupanje po ranijem podnesenom zahtjevu.

##### Tarifni broj 2.

- Za sva rješenja za koja nije propisana posebna taksa plaća se ..... 20 KM
- Napomena:
  1. Ako se donosi jedno rješenje po zahtjevu više lica taksa po ovom tarifnom broju plaća se onoliko puta koliko ima lica kojima se rješenje uručuje.
  2. Za rješenja donijeta po žalbama ne plaća se taksa.

##### Tarifni broj 3.

- Za žalbu protiv rješenja plaća se ..... 15 KM

##### Tarifni broj 4.

I Za akte kojima se odobrava obavljanje ugostiteljske djelatnosti plaća se taksa i to:

- iz skupine hoteli: (hoteli, moteli) plaća se taksa.....400 KM
- iz skupine kampovi i druge vrste ugostiteljskih objekata za smještaj plaća se taksa.....200 KM
- iz skupine restorani (restoran, gostionica, zdravljak, mliječni restoran, krčma, konoba, picerija, ćevabdžinica, aščinica, buregdžinica, objekat brze prehrane-fash food) plaća se taksa..... 150 KM
- iz skupine barovi (bar-noćni klub) noćni bar plaća se taksa.....300 KM
- za objekte disko klub i disko bar plaća se taksa ..... 200 KM
- iz skupine "Bufet" (pivnica i bistro) plaća se .....150 KM
- iz skupine kafana (kavane): kaffe bar, kafe – slastičarnica plaća se taksa.....150 KM
- iz skupine kantine i pripremnice obroka (kantine) i pripremanje obroka (catering) plaća se taksa .....100 KM

#### II Za akte o osnivanju trgovinske radnje:

- za trgovinske radnje za promet robe na malo vrste:
- klasične prodavnice, drgstora, specijalizirane prodavnice, diskontna prodaja i butik plaća se taksa .....150 KM
- trgovke – kioska plaća se taksa.....100 KM
- pokretne prodavnice.....100 KM
- pijačne tezge..... 50 KM

#### III Prevoznička djelatnost:

Za izdavanje odobrenja za vršenje prevoza teretnim motornim vozilom plaća se taksa :

- za motorno vozilo nosivosti do 5 tona, po toni nosivosti plaća se taksa .....30 KM
- za motorno vozilo nosivosti do 10 tona, po toni nosivosti plaća se taksa.....15 KM
- za motorno vozilo nosivosti preko 10 tona, po toni nosivosti plaća se taksa .....10 KM

Za akte o odobravanju prevoza za lične potrebe plaća se taksa:

- za teretno motorno vozilo po toni nosivosti.....10 KM
- za prevoz radnika po sjedištu .....5 KM
- za taksi prijevoz po sjedištu (osim sjed. vozača)... .....10 KM

Za akte o produženju važnosti odobrenja za prijevoz plaća se taksa .....20 KM

#### IV Zanatske radnje:

- za radnje vrste pekarske i mlinarske.....100 KM

- za automehaničarske, autoelektričarske, autolimarske i autolakirerske.....100 KM
- za frizerske, manikerske, pedikerske.....100 KM
- za zidarske, fasaderske, molerske, farbarske, paketarske, teracerske, staklorezačke i stolarske.....100 KM
- za instalaterske centralno grijanje, vodoinstalaterske i elektroinstalaterske....100 KM
- za bravarske i limarske metalostrugarske..100 KM
- za krojačke i konfekcijske.....100 KM
- za zlatarske filigranske.....100 KM
- za plastičarske.....100 KM
- za mesarske.....150 KM
- za obavljanje domaće radinosti..... 50 KM
- za auto škole i videoteke.....100 KM
- za organizovanje zabavnih igara putem aparata za zabavu vrste fliperi i pikadu-darts bilijara – dopuna bilijar.....100 KM
- za ostale vrste zanatskih radnji i drugih uslužnih djelatnosti.....100 KM
- za autopraone..... 50 KM

Tarifni broj 5.

Za akte o ispunjenosti minimalnih tehničkih uslova plaća se taksa:

Ia) Iz oblasti ugostiteljstva:

- Pravna lica.....150 KM
- Fizička lica.....100 KM

I Ib) Iz oblasti trgovine:

- Pravna lica.....100 KM
- Fizička lica..... 80 KM

IIIc) Iz oblasti zanatstva:

- Pravna lica.....100 KM
- Fizička lica..... 50 KM

Tarifni broj 6.

Za odobrenja za rad van poslovnih prostorija u dane vašara, praznika i pijacama plaća se taksa:

- za tezge..... 20 KM
- za šatre ugostiteljskih radnji..... 30 KM

Tarifni broj 7.

Za akt o odjavi djelatnosti plaća se taksa..... 20 KM

Tarifni broj 8.

Za akt o privremenoj odjavi djelatnosti plaća se taksa..... 30 KM

Tarifni broj 9.

Za akte o organizovanju zabave za goste sa muzikom uživo plaća se taksa:

- za muzički dan..... 10 KM

Tarifni broj 10.

Taksa za ovjeru poslovnih knjiga plaća se po jednom listu.....0,20 KM

Tarifni broj 11.

Za zahtjev za sječu šume plaća se taksa..... 10 KM

Tarifni broj 12.

Za izdavanje urbanističke saglasnosti plaća se taksa:

1. individualno stambeni objekti i vikendice (izgradnja) rekonstrukcija i dogradnja.....50 KM
2. stambeno-poslovni objekti (izgradnja, rekonstrukcija, dogradnja)..... 80 KM
3. poslovni objekti (izgradnja, rekonstrukcija i dogradnja) do 30 m<sup>2</sup>..... 60 KM  
od 30 do 100 m<sup>2</sup>..... 100 KM  
i preko 100 m<sup>2</sup> ..... 150 KM
4. pomoćni objekti garaže, šupe i sl. (izgradnja, dogradnja i rekonstrukcija)..... 30 KM

Tarifni broj 13.

Za izdavanje protokola regulacione ili građevinske linije:

1. za jednu ulicu plaća se..... 20 KM
2. za više ulica plaća se..... 30 KM

NAPOMENA: Za obnovu regulacionog polja plaća se 70% od odgovarajuće takse po ovom tarifnom broju.

Tarifni broj 14.

Za akt kojim se odobrava podizanje hidrotehničkih postrojenja u cilju korištenja vodenih snaga:

1. za protočna postrojenja (male elektrane, vodenice, valajrnice, strugare i mlinove):
  - a) do 500 KW plaća se..... 10 KM
  - b) preko 500 do 1000 KW..... 15 KM
  - c) preko 1000 KW plaće se..... 20 KM
2. Za uređenje za vodovode, navodnjavanje i meliorizaciju kao i dr. vodozahvate:
  - a) do 100 litara kapaciteta u jednoj sekundi ... ..... 10 KM
  - b) preko 1000 lit. u jednoj sekundi plaća se... ..... 25 KM

Za rješenja kojim se odobrava podizanje postrojenja sa akumulacijom plaća se taksa iz tačke 1. odnosno tačke 2. ovog tarifnog broja uvećana za 50%.

NAPOMENA: Taksa po ovom tarifnom broju ne plaća se za odobrenja koja su podložna plaćanju takse po tarifnom broju 14. ove taksene tarife.

#### Tarifni broj 15.

Za odobrenje za građenje plaća se taksa prema vrijednostima objekta 0,050/00 promila.

NAPOMENA: Ova taksa za poslovne objekte do 30 m<sup>2</sup> i sve stambene objekte ne može biti veća od 10 KM, a za veće poslovne objekte i stambeno-poslovne nemože biti veća od ..... 50 KM

#### Tarifni broj 16.

Za odobrenje za upotrebu objekata plaća se taksa prema vrijednosti objekta 0,050 promila.

#### Tarifni broj 17.

Uvjerenja:

Za uvjerenja koji izdaju organi uprave a koje nije drugačije propisano plaća se..... 10 KM

#### Tarifni broj 17a.

1. Za izvod iz matičnih knjiga i uvjerenja po čl. 169. ZUP-a plaća se.....2 KM
2. Za izvode iz matičnih knjiga na internacionalnim obrascima..... 25 KM
3. Za uvjerenja o slobodnom bračnom stanju u svrhu zaključenja braka van BiH..... 25 KM
4. Za vjenčanja plaća se:
  - a) u radne dane..... 30 KM
  - b) vjenčanje van radnog vremena.....100 KM
  - c) vjenčanje van prostorija matične službe imjernih ureda.....150 KM
  - d) vjenčanje kada je jedan bračni drug strani državljanin ..... 150 KM
  - e) vjenčanje kada su oba bračna druga strani državljanjani..... 200 KM
  - f) vjenčanje kada je jedan od bračnih drugova zastupan po punomoćniku..... 100 KM
5. Za potvrde o izdržavanju za inostranstvo plaće se .....50 KM
6. Za kućnu listu za DD u inostranstvu 50 KM
7. Potvrda o prijemu novca. .... 30 KM
8. Za potvrdu o životu plaća se ..... 7 KM
9. Za upis stranih državljanjani u MK i KD .....50 KM
10. Prenos upisa BH državljanjani u MK iz inostranstva..... 30 KM
11. Za izradu zapisnika opriznavanju očinstva i pozakonjenja djece..... 10 KM

12. Za izradu zapisnika o promjeni prezimena .....20 KM
13. Za izradu smrtovnica, plaće se..... 5 KM
14. Korištenje sale za vjenčanje.....50 KM
15. Provođenje presuda inostranih subjekata.20 KM
16. Korištenje predmeta iz arhive..... 10 KM

#### Tarifni broj 18.

Za uvjerenja kojima se dokazuje porijeklo i vrijednost količina i kvalitet ili zdravstvena ispravnost robe plaća se.....20 KM

NAPOMENA: Ova taksa ne plaća se na inostrane poštanske deklaracije koje prate sprovedni list.

#### Tarifni broj 19.

Za ovjeru potpisa rukopisa i prepisa plaća se:

1. za ovjeru svakog potpisa na punemoći.....8 KM
2. za ovjeru autentičnosti rukopisa ili za ovjeru prepisa do 5 (pet) polutabaka..... 3 KM

NAPOMENA:

1. Pod polutabakom podrazumijeva se list hartije od dvije strane normalnog kancelarijskog formata ili manjeg.
2. Ako je rukopis odnosno prepis čija se ovjera vrši na stranom jeziku plaća se dvostruka taksa iz tačke 2. ovog tarifnog broja.
3. Ako rukopis odnosno prepis iz tačke 2. ovog tarifnog broja sadrži više od 5 (pet) polutabaka, ovjera za svaki naredni polutabak plaća se 1 KM.

#### Tarifni broj 20.

Za ovjeru potpisa na ugovorima na ime takse plaća se po potpisu..... 5 KM

Za ovjeru produženja važenja ugovora smatra se u pogledu takse kao nov ugovor.

NAPOMENA:

1. Smatra se da je izvršena ovjera ugovora kada se ovjeravaju potpisi ugovornih strana.
2. Svaka izmjena sadržine ugovora smatra se u pogledu takse kao nov ugovor.

#### Tarifni broj 20a.

Za izlazak na teren radi ovjere, plaća se..... 20 KM

#### Tarifni broj 21.

Za prepisivanje službenih akata ili dokumenata koji se vrše kod organa:

1. Kad prepisivanje vrše zainteresovana lica od polutabaka originalan plaća se..... 5 KM
2. Kad prepisivanje vrši organ od polutabaka originala plaća se ..... 10 KM
3. Kad organ vrši prepisivanje akata ili dokumenata na stranom jeziku od polutabaka

plaća se..... 15 KM

NAPOMENA: Važe odredbe tačke 1. napomene uz tarifni broj 19.

#### Tarifni broj 22.

Za opomenu kojom se poziva da plati dužnu taksu plaća se..... 5 KM

NAPOMENA: Taksa po ovom tarifnom broju plaća se za netaksirane, nedovoljno taksirane podneske.

#### Tarifni broj 23.

Za razmatranje svršenih spisa plaća se ..... 10 KM

#### Član 3.

Takseni obveznik je lice po čijem je zahtjevu pokrenut postupak ili se radnje vrše, predviđene tarifom.

Ako za istu taksu postoje dva ili više obveznika njihova obaveza je solidarna.

#### Član 4.

Ako taksenom tarifom nije drugačije propisano, taksena obaveza nastaje:

1. Za podneske u trenutku kada se predaju a za podneske date u zapisnik kada se zapisnik sastavlja.
2. Za rješenja i druge isprave u trenutku podnošenja zahtjeva za njihovo izdavanje.
3. Za pravne radnje u trenutku podnošenja zahtjeva za izvršenje tih radnji.

#### Član 5.

Takse se plaćaju u trenutku nastanka taksene obaveze ako ovom Odlukom nije drugačije određeno.

#### Član 6.

Ako je taksenom tarifom propisano da se taksa plaća prema vrijednosti predmeta, kao osnovica za obračun takse uzima se vrijednost označena u podnesku ili ispravi ili vrijednosti utvrđene procjenom organa koji vodi postupak.

#### Član 7.

Kada se isprava za koju se plaća taksa po zahtjevu stranke izdaje u dva ili više primjeraka, za drugi i svaki dalji primjerak plaća se taksa u visini od 50% od takse za prvi primjerak.

#### Član 8.

U rješenju i u drugoj ispravi za koju je taksa plaćena mora se označiti da je taksa plaćena, u kojem iznosu i po kojem tarifnom broju.

#### Član 9.

Netaksirani ili nedovoljno taksirani podnesci ili drugi spisi neće biti primljeni neposredno od stranke.

Ako ne taksirani ili nedovoljno taksirani podnesak stigne poštom organ nadležan za odlučivanje po tom podnesku pozvat će taksenog obveznika da u roku od 8 dana izvrši uplatu redovne takse i takse za opomenu.

Nadležni organ može pokrenuti postupak po netaksiranom zahtjevu ili nedovoljno taksiranom u slučaju iz prethodnog stava ali rješenje nemože biti uručeno prije nego što bude plaćena taksa iz prethodnog stava.

#### Član 10.

Spisi i radnje koje se vode po službenoj dužnosti ne podliježu plaćanju takse.

#### Član 11.

Od plaćanja takse oslobođeni su:

1. Državni organi, javne ustanove i javni fondovi
2. Mjesne zajednice
3. Udruženja građana u oblasti sporta, kulture i fizičke kulture
4. Humanitarne organizacije i udruženja građana u obavljanju humanitarne djelatnosti
5. Članovi porodica šehida-poginulih boraca, RVI i nezaposleni demobilisani borci, na osnovu posebne isprave izdate od nadležnog organa.
6. Građani za spise i radnje u vezi zasnivanja radnog odnosa i ostvarivanja i zaštitom prava iz radnog odnosa
7. Učenici i studenti za sve spise i radnje u vezi sa redovnim školovanjem

#### Član 12.

Kao dokaz o svom statusu, koje je utvrđeno kao osnov za oslobađanje od plaćanja takse stavom 1. tačka 5,6,7 prethodnog člana, građanin je dužan dati na uvid odgovarajući dokument ili javnu ispravu što će se konstatovati u vidu službene zabilješke na podnesku u slučaju kada se isti predaje nadležnom organu, a u slučaju kada se podnesak šalje poštom građanin je dužan priložiti ovjerenu kopiju tog dokumenta ili javne isprave.

#### Član 13.

Kada je postupak pokrenut na zahtjev više lica od kojih su neka lica oslobođena od plaćanja takse, taksu u tom postupku plaća samo građanin koji nije oslobođen plaćanja takse.

#### Član 14.

Oslobođeni su od takse sledeći spisi i radnje:

01. Prijedlozi, prijave i drugi podnesci u općem interesu
02. Spisi i radnje u postupku priznavanja prava oslobađanja plaćanja taksa
03. Spisi i radnje u postupku povrata nepravilno uplaćenih dažbina
04. Spisi i radnje u postupku ispravljanja grešaka u rješenjima, drugim ispravama i službenim evidencijama
05. Spisi i radnje u postupku upisa u službene evidencije, knjigu državljana i matične knjige
06. Spisi i radnje za ostvarivanje prava iz zdravstvenog, penzijskog i invalidskog osiguranja
07. Spisi i radnje u postupku regulisanja socijalne pomoći i materijalnog obezbjeđenja
08. U ostvarivanju prava boraca, RVI i porodica poginulih boraca
09. Spisi i radnje u postupku rješavanja statusa i ostavriavanja prava izbjeglih i raseljenih lica
10. Spisi i radnje u postupku raspravljanja uzurpacija
11. Dodnesci upućeni organima za predstavke i pritužbe
12. Diplome, svjedodžbe i uvjerenja u sticanju obrazovanja u osnovnim i srednjim školama.
13. U vezi sa Civilnom Zaštitom,
14. Sve vrste dokumenata koji su potrebni za upis u birački spisak.

#### Član 15.

U ispravama koje su oslobođene od plaćanja takse mora se naznačiti u kom se cilju izdaju i na osnovu kog propisa su oslobođeni od plaćanja takse, a u druge svrhe se mogu koristiti samo kad za njih bude plaćena odgovarajuća taksa.

#### Član 16.

Za akte kojima se osnivaju radnje koje su Odlukom proglašene kao deficitarne plaća se taksa u visini od 50% od predviđene takse.

#### Član 17.

Takse se plaćaju u gotovom novcu.

#### Član 18.

Prisilna naplata takse vrši se po propisima o prisilnoj naplati poreza od građana i pravnih lica.

#### Član 19.

Lice koje je taksu platilo u gotovom novcu koju nije bio dužan da plati ima pravo na povraćaj

takse. Postupak za povraćaj takse pokreće se po zahtjevu stranke kog organa kome je taksa plaćena. Povraćaj takse vrši se na teret prihoda budžeta Općine.

#### Član 20.

Pravo na naplatu takse zastarijeva u roku od dvije godine računajući od dana kada je taksu trebalo platiti, a pravo na povraćaj takse zastarijeva u roku od dvije godine kada je taksa plaćena.

#### Član 21.

Kontrolu primjene odredaba ove Odluke vrši Služba za poduzetništvo i budžet.

#### Član 22.

Administrativne takse utvrđene i iskazane u Tarifi općinskih administrativnih taksi prihod su budžeta općine Kalesija a plaćaju se u KM na uplatne račune kod ovlaštene banke, pošte, utvrđenih tarifom općinskih administrativnih taksi koji su sastavni dio Odluke.

#### Član 23.

Do donošenja odluke o naplati takse taksenim markama, taksa se plaća isključivo u gotovom novcu, ukoliko drugim propisima nije drugačije određeno.

#### Član 24.

Danom stupanja na snagu ove Odluke prestaje da važi Odluka o općinskim administrativnim taksama ("Sl. glasnik općine Kalesija", br: 1/98, 4/01 i 4/02).

#### Član 25

Ova Odluka stupa na snagu danom objavljivanja u "Sl. glasniku općine Kalesija".

Bosna i Hercegovina  
Federacija Bosne i Hercegovine  
TUZLANSKI KANTON  
OPĆINA KALESIJA  
OPĆINSKO VIJEĆE  
Broj: 01-05-2-597  
Datum, 28.02.2005. godine

PREDSJEDAVAJUĆI  
OPĆINSKOG VIJEĆA  
Hata Mujčinović, dipl. ing. tehn.s.r.

## 17

Na osnovu člana 13. i 46. Zakona o građevinskom zemljištu («Sl. novine FBiH» broj 25/03) i člana 41. Statuta Općine Kalesija («Sl. glasnik općine Kalesija», broj 7/03), Općinsko vijeće Kalesija na sjednici održanoj dana 28.02.2005. godine, d o n o s i

## ODLUKU

o izmjenama i dopunama Odluke o  
građevinskom zemljištu

### Član 1.

U članu 24. nakon stava 2, dodaju se slijedeći stavovi 3; 4; 5; 6; 7:

"Za članove komisije se mogu imenovati lica koja posjeduju stručnu spremu: dipl. pravnik, dipl. ing. geodezije, dipl. ekonomista ili dipl. ing. arhitekture.

Članovi Komisije ne mogu biti pomoćnici Općinskog načelnika koji rukovode radom općinskih službi.

Administrativno tehničke poslove za potrebe komisije obavlja sekretar komisije kojeg imenuje Općinski načelnik.

Komisija vodi zapisnik o svom radu prilikom otvaranja i razmatranja prijave.

Članovi komisije odgovorni su za svoj rad Općinskom vijeću."

### Član 2.

Iza člana 25. Odluke, dodaju se novi članovi 25 a; i 25 b:

#### Član 25 a.

"Prijava na konkurs se podnosi sa svim podacima potrebnim za učešće na konkursu, što podrazumijeva da je učesnik dužan priložiti kompletnu dokumentaciju kojom se dokazuju činjenice na osnovu kojih se utvrđuje lista prvenstva."

#### Član 25 b.

"Prijave se podnose u zatvorenoj kovrti neposredno na pisarnici općine ili preporučenom poštanskom pošiljkom.

Ako se prijava dostavlja na pisarnici, sekretar Komisije na zahtjev stranke izdat će potvrdu o prijemu sa naznakom datuma prijema prijave na konkurs.

Prijave se čuvaju neatvorene sve do momenta otvaranja od strane komisije za provođenje javnog konkursa".

### Član 3.

Član 26. Odluke mijenja se i glasi:

"Komisija prije otvaranja koverta utvrđuje blagovremenost podnesene prijave. Otvaranje prijave se vrši javno. Nakon otvaranja koverta, komisija provjerava potpunost i ispravnost prijave. Ako prijava ispunjava predviđene formalne uslove, komisija na osnovu priloženih dokaza utvrđuje redoslijed, prvenstva učesnika konkursa, prema kriterijima predviđenim ovom odlukom.

Prijava koja je dostavljena nakon isteka roka u kojem je konkurs otvoren neće se ni razmatrati i vratit će se podnosiocu."

### Član 4.

Član 27. Odluke, mijenja se i glasi:

"Komisija koja provodi javni konkurs dostavit će zaključak o rezultatima konkursa svim učesnicima, javnog natječaja (konkursa) u roku od 8 dana po zaključenju konkursa.

Učesnici javnog konkursa mogu u roku od 8 dana od dana dostavljanja zaključka o rezultatu javnog konkursa, izjaviti prigovor Općinskom vijeću protiv tog zaključka.

Nakon isteka roka od 8 dana, Komisija dostavlja zaključak o rezultatu javnog konkursa sa prigovorima učesnika javnog konkursa Općinskom vijeću, radi donošenja odluke o dodjeli zemljišta.

Prije dostavljanja Općinskom vijeću, Konkursna komisija razmatra prigovore i daje obrazloženi prijedlog Općinskom vijeću."

### Član 5.

Član 28. Odluke mijenja se i glasi:

"Ukoliko učesnik javnog konkursa sa utvrđene liste prvenstva odustane od utvrđenog prava na dodjelu neizgrađenog građevinskog zemljišta ili mu se rješenjem službe za imovinsko-pravne poslove utvrdi gubitak prava korištenja zemljišta radi gradnje, pravo na dodjelu zemljišta ima slijedeći učesnik javnog konkursa sa utvrđene liste prvenstva koji zbog ograničenog broja građevinskih parcela koje su predmet dodjele putem konkursa nije ostvario pravo na dodjelu neizgrađenog građevinskog zemljišta.

Ova član se ne odnosi na javne konkurse za izgradnju privrednih, poslovnih, stambeno-poslovnih, stambenih i drugih objekata namijenjenih za tržište».

### Član 6.

Član 29. Odluke mijenja se i glasi:

"1. Odredbama ovog člana uređuju se kriteriji za određivanje prava prvenstva na javnom konkursu za dodjelu građevinskog zemljišta radi građenja individualnih stambenih objekata.

#### a) Kriterij-broj članova porodičnog domaćinstva

- za svakog člana koji trajno živi i stanuje sa učesnikom konkursa ..... 2 boda

#### b) Kriterij-novčana primanja po članu porodičnog domaćinstva:

- iznos primanja od 100,00 KM ili manje po članu .....10 bodova

- iznos primanja od 100,00 – 150,00 KM po članu ..... 8 «
- « « 150,00- 200,00 KM po članu ..... 6 «
- « « 200,00- 250,00 KM po članu ..... 4 «
- preko 250,00 KM po članu 2 «

**c) Kriterij-invalidne osobe sa tjelesnim oštećenjem:**

Učesnik javnog konkursa koji je ratni vojni invalid ili članovi njegovog porodičnog domaćinstva sa tjelesnim oštećenjem, boduju se kako slijedi:

- Tjelesno oštećenje od 80 – 100 %..... 10 bodova
- « « od 60 – 80 %..... 8 bodova
- « « od 40 – 60 % ..... 6 «
- « « od 20 – 40 %.... 4 «

Invalidi rada i druge kategorije koje ne spadaju u kategorije iz prethodnog stava boduju se sa dva (2) boda manje u odnosu na broj bodova koji pripada licima iz prethodnog stava s istim tjelesnim oštećenjem.

**a) Kriterij-demobilizirani pripadnici OS RBiH:**

- Za svaki mjesec proveden u oružanim snagama 0,2 boda.

**b) Kriterij – osoba kojoj je u toku rata poginuo član porodičnog domaćinstva kao pripadnik oružanih snaga FBiH ili su stradali kao žrtve u toku rata:**

- Lica koja ostvare pravo prvenstva za dodjelu građevinskog zemljišta radi građenja individualnih stambenih objekata plaćaju naknadu za zemljište u visini utvrđenoj odlukom Općinskog vijeća.

Po osnovu ovog kriterija učesniku javnog konkursa pripada 10 bodova.

Članovima porodičnog domaćinstva smatraju se osobe koje to svojstvo imaju po Zakonu.

**2. Kriterij za određivanje prava prvenstva fizičkih i pravnih lica za izgradnju privrednih, poslovnih, stambeno-poslovnih, stambenih i drugih objekata u vlasništvo i namijenjenih za tržište:**

Prednost za dodjelu neizgrađenog građevinskog zemljišta radi izgradnje privrednih, poslovnih, stambeno-poslovnih, stambenih i drugih objekata namijenjenih tržištu imaju fizička i pravna lica koja ponude najveću naknadu za dodjeljeno zemljište u odnosu na početnu naknadu naznačenu u javnom konkursu.

Visina početne naknade za dodijeljeno zemljište obuhvata jedinstveno, naknadu za zemljište i naknadu iz osnova prirodnih pogodnosti zemljišta i pogodnosti već izgrađene komunalne infrastrukture koje mogu nastati prilikom korištenja tog zemljišta, a koje nisu rezultat ulaganja sredstava vlasnika ili korisnika nekretnine.

**3. Određivanje prava prvenstva kod dodjele neizgrađenog građevinsko zemljišta na korištenje radi građenja neposrednom pogodbom:**

U skladu sa programom izgradnje u Općini dodjele neizgrađenog građevinskog zemljišta neposrednom pogodbom vrši se putem javnog poziva koji se objavljuje u srdstvima javnog informisanja.

Pravo prvenstva za dodjelu putem neposredne pogodbe imaju pravna lica koja ponude najveću naknadu za dodjeljeno građevinsko zemljište u odnosu na početnu naknadu naznačenu u javnom pozivu.

Ponude dostavljene po javnom pozivu razmatra komisija shodno odredbama o javnom konkursu ove odluke.

**Član 7.**

Član 36. Odluke mijenja se i glasi:

«Općinski načelnik će u roku od 30 dana od dana stupanja na snagu ove odluke donijeti Uputstvo o dokumentaciji koja služi kao dokaz za ispunjavanje kriterija iz ove odluke i o drugim pitanjima neophodnim za njenu provedbu».

**Član 8.**

Ova Odluka stupa na snagu danom objavljivanja u «Službenom glasniku općine Kalesija».

Bosna i Hercegovina  
Federacija Bosne i Hercegovine  
TUZLANSKI KANTON  
OPĆINA KALESIJA  
OPĆINSKO VIJEĆE

PREDSJEDAVAJUĆI  
OPĆINSKOG VIJEĆA

Hata Mujčinović, dipl. ing. tehn.s.r.

Broj: 01-05-2-598  
Datum, 28.02.2005. godine

---

**18**

Na osnovu člana 11. stav 3. Zakona o uzurpacijama («Sl. list SRBiH», broj 6/78) i člana 41. Statuta općine Kalesija («Sl. glasnik općine Kalesija», br. 7/03), Općinsko vijeće na svojoj sjednici održanoj dana 28.02.2005. godine, d o n o s i



## ODLUKU

o visini naknade za nepriznato uzurpirano zemljište u 2005. godini

### Član 1.

Za nepriznato uzurpirano zemljište, za koja će se uzurpantima zemljoradnicima određivati naknada u 2005. godini, određuje se slijedeća visina naknade:

- a) Za poljoprivredna zemljišta u iznosu sedmostrukog jednogodišnjeg katastarskog prihoda sa uzurpiranog zemljišta.
- b) Za neplodna zemljišta u iznosu sedmostrukog jednogodišnjeg katastarskog prihoda sa pašnjaka najniže klase u istoj katastarskoj općini.

### Član 2.

Ova odluka stupa na snagu danom objavljivanja u «Službenom glasniku općine Kalesija», a primjenjivat će se od 01.01.2005. godine.

Bosna i Hercegovina  
Federacija Bosne i Hercegovine  
TUZLANSKI KANTON  
OPĆINA KALESIJA  
OPĆINSKO VIJEĆE  
Broj: 01-05-2-599  
Datum, 28.02.2005. godine

PREDSJEDAVALAČI  
OPĆINSKOG VIJEĆA

Hata Mujčinović, dipl. ing. tehn.s.r.

## 19

Na osnovu člana 49. Zakona o eksproprijaciji («Sl.list SRBiH», broj 12/87 ) i člana 41. Statuta Općine Kalesija («Sl. glasnik općine Kalesija», broj 7/03), Općinsko vijeće Kalesija na sjednici održanoj dana 28.02.2005. godine, d o n o s i

## ODLUKU

o načinu i uslovima određivanja naknade za ekspropirisano poljoprivredno zemljište u 2005. godini

### Član 1.

Ovom Odlukom određuju se bliži uslovi i mjerila za određivanje naknade za ekspropirisano poljoprivredno zemljište na području Općine Kalesija u 2005. godini.

### Član 2.

Pri određivanju naknade za ekspropirisano poljoprivredno zemljište cijenit će se korist koju

može dati to zemljište redovnim iskorištavanjem, korist koju je raniji vlasnik imao od tog zemljišta, a naročito tržišnu cijenu tog zemljišta.

### Član 3.

Tržišna cijena ekspropirisano poljoprivrednog zemljišta utvrđuje se na osnovu podataka o prometnoj vrijednosti koje daje Kantonalna porezna uprava – ispostava Kalesija i podataka o iznosima iz postignutih sporazuma o određivanju pravične naknade za ekspropirisano zemljište u toj katastarskoj općini.

### Član 4.

Ako je vrijednost poljoprivrednog zemljišta uvećana kao rezultat neposrednog ili posrednog ulaganja državnih sredstava i ako na formiranje tržišne cijene utiču okolnosti što se poljoprivredno zemljište nalazi u naseljima ili u blizini tih naselja, saobraćajnica, naknada će se umanjiti razmjerno tim okolnostima koje su uticale na povećanje vrijednosti poljoprivrednog zemljišta.

U slučaju iz prethodnog stava, kada je predmet eksproprijacije obradivo poljoprivredno zemljište zemljoradnika, kome je prihod od tog zemljišta jedini i glavni uslov za egzistenciju ne vrši se umanjenje naknade.

### Član 5.

Okolnosti iz člana 2 stav 3. ove Odluke utiču na povećanje kod formiranja tržišne cijene poljoprivrednog zemljišta uz sljedeće saobraćajnice:

1. Put Tuzla-Simin Han-Međaš, na udaljenosti od 300 metara na obje strane od ose puta.
2. Put Tuzla-Banj Brdo na udaljenosti 300 metara na obje strane.
3. Put Živinice-Međaš -Memići -RS na udaljenosti 300 metara sa obje strane od ose puta.
4. Put Kalesija pogon-Sapna na udaljenosti 200 metara sa obje strane od ose puta.

### Član 6.

Tržišna cijena poljoprivrednog zemljišta navedena u članu 5 tačke 1. ove Odluke umanjuje se za 30%.

Tržišna cijena poljoprivrednog zemljišta navedena u članu 5 tačke 2. ove Odluke umanjuje se za 20%.

Tržišna cijena poljoprivrednog zemljišta navedena u članu 5 tačke 3. ove Odluke umanjuje se za 30%.

Tržišna cijena poljoprivrednog zemljišta navedena u članu 5 tačke 4. ove Odluke umanjuje se za 30%.

#### Član 7.

Ova Odluka stupa na snagu danom objavljivanja u Službenom glasniku Općine Kalesija.

Bosna i Hercegovina  
Federacija Bosne i Hercegovine  
TUZLANSKI KANTON  
OPĆINA KALESIJA  
OPĆINSKO VIJEĆE  
Broj: 01-05-2-600  
Datum, 28.02.2005. godine

PREDSJEDAVAJUĆI  
OPĆINSKOG VIJEĆA

Hata Mujčinović, dipl. ing. tehn.s.r.

2. Općinski vodovod, koji je u vlasništvu Općine, a služi za snabdijevanje vodom potrošača u gradu Kalesija, prigradskim naseljima i drugim naseljenim mjestima na području Općine.
3. Grupni vodovodi, koji su u vlasništvu stanovnika koji su ga izgradili za svoje potrebe a služe za snabdijevanje vodom seoskih naselja, a isti koristi 500 ili više stanovnika.
4. Mjesni vodovodi, koji su u vlasništvu stanovnika koji su ga izgradili za svoje potrebe a služe za snabdijevanje vodom seoskih naselja, a isti koristi manje od 500 stanovnika i
5. Javne česme i javni bunari a koji služe za vodosnabdijevanje manje grupe građana u naseljima.

## 20

Na osnovu člana 19, 23. i 31. Zakona o vodama ("Sl. novine FBiH", br. 18/98), člana 4. 19. 22. 23. 24. 25. 52. i 79 do 99. Zakona o vodama ("Sl. novine TK-a" br. 15/99), člana 3. Zakona o komunalnim djelatnostima ("Sl. list SR BiH", br. 20/90) i člana 41. Statuta općine Kalesija ("Službeni glasnik općine Kalesija", br. 7/03), Općinsko vijeće Kalesija na sjednici održanoj dana 28.02.2005. godine, d o n o s i

### ODLUKU

o vodosnabdijevanju na području općine Kalesija

#### Član 1.

Ovom Odlukom propisuju se uslovi za: izgradnju, rekonstrukciju, upravljanje, održavanje, korištenje i zaštitu objekata i uređaja za vodosnabdijevanje na području općine Kalesija (u daljem tekstu Općine).

#### I OPĆE ODREDBE

##### Član 2.

Vodoprivredni objekti za vodosnabdijevanje na području općine su: vodozahvati (bunari, zahvati na vodotocima, crpne stanice, ustave), rezervoari, dovodna i razvodna mreža, uređaji za kondiciranje vode i drugi pripadajući objekti i oprema, te javni bunari i javne česme.

Vodovodi na području općine mogu biti:

1. Kantonalni vodovodi koji su u vlasništvu Kantona, a služe za snabdijevanje vodom potrošača dvije ili više Općina na području Tuzlanskog kantona,

#### Član 3.

Pojedini pojmovi upotrebljeni u ovoj Odluci imaju sledeća značenja:

- Vodovodnim uređajima vodovodne mreže, smatraju se svi objekti za zahvat vode, izvorišta, uređaji za prečišćavanje vode, crpna postrojenja sa uređajima, rezervoari, dovodna mreža, razvodna mreža sa priključcima i završavaju se sa vodomjerima.
- Priključne vodovodne instalacije (u daljem tekstu kućne instalacije), smatraju se sve ostale sprave i uređaji koji služe za snabdijevanje potrošača vodom iz vodovodne mreže i počinju iz vodomjera a završavaju se na ventilu odnosno slavini za ispuštanje vode.
- Individualni uređaji za snabdijevanje vodom su vodovodni uređaji koji funkcionišu neovisno od vodovodne mreže i služe za snabdijevanje vodom samo jednog potrošača, odnosno vlasnika tih uređaja.

#### II IZGRADNJA I REKONSTRUKCIJA VODOVODA

##### Član 4.

Izgradnja i rekonstrukcija objekata za snabdijevanje vodom i uređaja vrši se na način i pod uslovima propisanim federalnim Zakonom o vodama („Sl. novine FBiH“, br. 18/98), kantonalnim Zakonom o vodama („Sl. novine TK“ br.15/99), Zakonom o prostornom uređenju, Zakonom o građenju, odredbama ove Odluke i drugim propisima koji regulišu ovu oblast.

Odobrenje za radove iz predhodnog stava, na zahtjev investitora, daje organ uprave nadležan za urbanizam i građenje, a po predhodno pribavljenoj vodoprivrednoj saglasnosti od strane nadležnog organa za poslove vodoprivrede.

Investitor za izgradnju općinskog vodovoda je općina, a investitor za izgradnju mjesnih vodovoda, grupnih vodovoda, javnih česmi i javnih bunara može biti mjesna zajednica, grupa građana, odnosno građanin pojedinac.

Općina može biti sufinansijer kod izgradnje mjesnih vodovoda, grupnih vodovoda ili javnih česmi i bunara, ukoliko je to u skladu sa programom razvoja lokalne infrastrukture i drugih akata donesenim od strane Općinskog vijeća i u slučaju ako će upravljanje tim objektima biti povjereno javnom vodovodnom preduzeću nadležnom za te poslove.

### **III UPRAVLJANJE I ODRŽAVANJE OPĆINSKIM VODOVODOM**

#### **Član 5.**

Postojeći gradski vodovod koji služi za snabdijevanje vodom grada Kalesija i okolnih naselja, novoizgrađeni „Vodovod Kalesija i okolna naselja“ sa bunarima na lokalitetu Krušika, koji služe za snabdijevanje vodom Kalesije Centra, Prnjavora, Tojšići, dijela Kikača i okolnih naseljenih mjesta (u daljem tekstu Općinski vodovod) je javno dobro u vlasništvu Općine Kalesija, koje se mora knjigovodstveno ustrojiti i procijeniti vrijednost istog, kako bi se u skladu sa Zakonskim propisima mogla izdvojiti sredstva na ime amortizacije, odnosno kako bi se mogao donijeti plan razvoja općinskog vodovoda.

#### **Član 6.**

Za utvrđivanje knjigovodstvene vrijednosti općinskog vodovoda, Općinski načelnik će formirati komisiju koja ima zadatak da utvrdi stvarno stanje u kome se trenuno nalaze postojeći i novoizgrađeni objekti za vodosnabdijevanje i vrijednost istih, na osnovu čega će se ustrojiti evidencija propisana u članu 5. ove Odluke.

#### **Član 7.**

Općina može pravo upravljanja, korištenja i održavanja nad općinskim vodovodom povjeriti Javnom preduzeću „Vodovod i kanalizacija Kalesija“ Kalesija ili nekom drugom pravnom licu registrovanom da se bavi djelatnošću snabdijevanja vodom (u daljem tekstu organ upravljanja). Organ upravljanja je dužan da iz cijene koštanja vode iz općinskog vodovoda obezbijedi troškove tekućeg održavanja i investicionog održavanja vodovoda u skladu sa važećim standardima i normativima, izdvajanje sredstava za amortizaciju, eventualnu otplatu anuiteta za kredite korištene za izgradnju, rekonstrukciju i sanaciju vodovoda, troškove

minimalnog broja propisanih pregleda ispravnosti vode i druge obaveze utvrđene Zakonom.

#### **Član 8.**

Prenos prava upravljanja nad općinskim vodovodom, sa objektima za zahvat vode, izvorištima, crpnim postrojenjima, rezeorvarima, primarnom i sekundarnom vodovodnom mrežom, čije je vlasnik općina Kalesija, uredit će se posebnom Odlukom Općinskog vijeća Kalesija.

#### **Član 9.**

Obaveza organa upravljanja je:

1. da neprekidno održava u ispravnom stanju vodovodne uređaje i mrežu,
2. da se stara o proširenju kapaciteta za vodosnabdijevanje (izvorišta i mreže),
3. da u skladu sa Zakonom i ovom Odlukom vrši priključenje objekata na vodovodnu mrežu, da vrši redovne preglede vode u vodovodnom sistemu i vrši redovnu dezinfekciju vode,
5. da u skladu sa Zakonskim i podzakonskim aktima vrši obračun i naplatu vode od potrošača.

#### **Član 10.**

Organ upravljanja je odgovoran za pravilnu primjenu propisa i tehničkih mjera, kojima se postiže ispravnost sistema.

#### **Član 11.**

Organ upravljanja je dužan da potrošačima u skladu sa tehničkim mogućnostima obezbijedi dovoljne količine vode za piće tokom svih 24 sata dnevno.

Ova obaveza može prestati u slučaju više sile (elementarne nepogode, nestanak električne energije) i većih tehničkih smetnji u pogonu i mreži.

U ovakvim slučajevima organ upravljanja je dužan obavijestiti potrošače o uzrocima prekida snabdijevanja vodom, kao i o roku otklanjanja smetnji.

U slučaju nemogućnosti snabdijevanja vodom, zbog rekonstrukcije i većih popravki, Organ upravljanja, je dužan da najmanje dva dana ranije, obavijesti potrošače o prekidu snabdijevanja vodom.

Organ upravljanja može prekinuti snabdijevanje vodom užeg kruga potrošača, bez obavještenja, ukoliko se radi o neophodnim hitnim popravkama mreže, kada takve popravke ne iziskuju prekid snabdijevanja vodom duži od 10 časova.

A Pripajanje na općinsku vodovodnu mrežu

#### Član 12.

Svaki stambeni, stambeno-poslovni, poslovni, vikend objekat i pomoćni objekat, koji se snabdijeva vodom iz općinskog vodovoda, mora imati poseban priključak preko vodomjera.

Organ upravljanja je obavezan da prilikom puštanja priključka u upotrebu, izvrši plombiranje ventila ispred vodomjera i vodomjer.

#### Član 13.

Organ upravljanja može pri davanju priključka dozvoliti da se preko jednog priključka vrši snabdijevanje više objekata (stambeni i pomoćni objekti kao što su štale, garaže, i sl. ali ne i za poslovni dio objekta) ako su izgrađeni na istoj građevinskoj parceli i stambenih jedinica u stambenim zgradama sa više stambenih jedinica.

Organ upravljanja ne smije dozvoliti da se vrši snabdijevanje vodom dva ili više stambenih, stambeno-poslovnih i poslovnih objekata, poslovnih prostora u istom objektu i vikend kuća preko jednog priključka, bez obzira na mjesto izgradnje i vlasničke odnose.

Organ upravljanja ne smije vršiti priključenje na vodovodnu mrežu stambenih, stambeno-poslovnih, poslovnih objekata i vikend kuća koje ne posjeduju građevinske dozvole (odobrenja za građenje).

#### Član 14.

Pravno ili fizičko lice postaje potrošač kada od organa upravljanja dobije odobrenje za puštanje priključka u upotrebu i sklopi ugovor o uslovima i načinu korištenja vode.

Postupak oko podnošenja zahtjeva za dobijanje priključka na javnu vodovodnu mrežu propisuje organ upravljanja, s tim da rok od dana podnošenja zahtjeva do dana obavještenja stranke po tom zahtjevu ne može biti duži od 15 dana.

Organ upravljanja nad općinskim vodovodom, dužan je podnosiocu zahtjeva dati:

- uslove i tehničke podatke potrebne za izradu projektne dokumentacije priključnih instalacija vodovoda,

- saglasnost za priključak objekta na općinski vodovod, ukoliko je projektna dokumentacija urađena na osnovu propisanih uslova i tehničkih podataka i ako postoje tehničke mogućnosti za priključenje.

#### Član 15.

Potrošnja vode mjeri se vodomjerom.

Potrošnja vode cijelog objekta mjeri se jednim vodomjerom na priključku istog objekta.

U slučaju neispravnog vodomjera ili u drugim slučajevima kada nije moguće vodomjerom izmjeriti potrošnju vode, potrošnja vode će se utvrditi u skladu sa članom 36.ove Odluke.

#### Član 16.

Vodomjeri moraju biti smješteni u poseno zatvorenom "skloništu" izgrađenom po određenim tipovima i uputstvima, koje daje organ upravljanja. "Skloništa" se izgrađuju na teret korisnika odnosno vlasnika objekta.

U „sklonište“ se postavlja jedan vodomjer ili više, ako se radi o stambeno-poslovnom objektu ili stambenom objektu za svaki stan posebno i svaki poslovni prostor odvojeno.

#### Član 17.

Organ upravljanja daje tehničke uslove za priključenje objekta na općinske vodovode izdavanjem odobrenja za priključenje.

Nakon pribavljenog ugovora potpisanog sa organom upravljanja izvodi se priključak.

#### Član 18.

Prije izvođenja priključka na općinske vodovode (mreže), potrošači su dužni platiti posebnu priključnu taksu.

Sredstva prikupljena po ovom osnovu uplaćivat će se na račun općine Kalesija sa naznakom „uplata priključne takse na općinski vodovod“, a koristit će se isključivo za rekonstrukciju, proširenje i otplatu anuiteta za kredite obezbijeđene za izgradnju općinskog vodovoda.

Priključnu taksu ili visinu priključne takse, shodno članu 20 ove Odluke, vršit će se putem nadležne Službe, a na prijedlog organa upravljanja.

Organ upravljanja je dužan podnositi izvještaj nadležnoj općinskoj službi svaka 3 (tri) mjeseca o broju izvršenih priključaka na općinske vodovode.

#### Član 19.

Visina priključne takse za stambene objekte, stanove u stambenim zgradama sa tri i više stambenih jedinica utvrđuje se u visini od 500,00 KM a za objekte javnih ustanova (škole, domovi zdravlja i sl.) utvrđuju se u visini od 2,00 KM/m<sup>2</sup> korisne površine objekta s tim što visina priključne takse ne može biti manja od 500 KM.

Visina priključne takse za poslovne prostore utvrđuje se u visini od 4,00 KM/m<sup>2</sup> korisne površine objekta, s tim što ova taksa ne može biti manja od 500,00 KM.

Plaćanje priključne takse obavezno je i kod dogradnje i nadzidivanja objekata (kada se radi o zasebnoj stambenoj ili poslovnoj jedinici).

Priključna taksa u slučaju promjene namjene objekta ili dijela tog objekta plaća se prema razlici cijene priključne takse propisane za raniju namjenu tog objekta i cijene priključne takse propisane za namjenu objekta koja se odobrava.

#### Član 20.

Ukoliko potrošači ličnim učešćem grade sekundarni vod općinskog vodovoda i mrežu za snabdijevanje vodom, isti predhodno moraju pribaviti pismenu saglasnost organa upravljanja i Općine, čiji je sastavni dio obavezno predmjer i predračun potrebnih radova, na osnovu čega će biti oslobođeni plaćanja takse ukoliko visina pojedinačnih davanja svakog učesnika prelazi visinu priključne takse iz predhodnog člana, ili dijela priključne takse (ukoliko je visina učešća manja od visine priključne takse, taksa se umanjuje za visinu učešća).

Za objekte čiji su investitori Općina, vatrogasne, vjerske i humanitarne organizacije može se izvršiti oslobađanje od plaćanja takse o čemu će Općinski načelnik donijeti posebnu Odluku.

Ukoliko se na bilo koji način utvrdi da je stvarno izgrađena površina objekta veća od površine na osnovu koje je ranije izračunata visina priključne takse, investitor objekta je dužan uplatiti razliku između ranije obračunate visine priključne takse i visine priključne takse izračunate za stvarnu površinu objekta.

#### Član 21.

Zabranjeno je, bez odobrenja nadležnog organa vršiti priključivanje objekata na općinsku vodovodnu mrežu.

Ako se takav priključak izvede organ upravljanja će izdati vodoprivredni nalog na osnovu kojeg će ga odmah isključiti.

#### Član 22.

Nabavku vodomjera za novi priključak vrši organ upravljanja na teret vlasnika objekta koji se priključuje na općinski vodovod i isti predaje organu upravljanja na upravljanje i održavanje.

Zamjena dotrajalih vodomjera koji su van funkcije osim u slučaju mehaničkog oštećenja, pada na teret organa upravljanja u skladu sa tekućim održavanjem vodoopskrbnih objekata.

Zamjeni vodomjera iz predhodnog stava podliježu vodomjeri ugrađeni nakon stupanja na

snagu ove Odluke i vodomjeri koji tipski i tehnički odgovaraju organu upravljanja, što će organ upravljanja pismeno sačiniti odluku u roku od 50 dana od dana stupanja na snagu ove odluke.

Novougrađeni vodomjer iz stava 1 i 2 mora odgovoriti uslovima utvrđenim posebnim Tehničkim propisom.

Potrošači koji nemaju ugrađen vodomjer dužni su u roku od 6 mjeseci izvršiti o svom trošku izgradnju "skloništa" i nabavku vodomjera, a ugradnju vodomjera izvršet će o svom trošku organ upravljanja.

#### Član 23.

Organ upravljanja može zahtijevati da se na jednom objektu, ako su u pitanju potrošači koji plaćaju različite cijene vode, ugrade paralelni, odnosno sporedni vodomjeri.

Potrošači mogu, uz saglasnost organa upravljanja, ugrađivati sporedne vodomjere i na kućnim instalacijama, radi utvrđivanja sopstvene potrošnje vode. Ove vodomjere održava i očitava organ upravljanja, a isti služe za obračun utroška vode pomenutog potrošača.

#### Član 24.

Vlasnik ili korisnik objekta održava „sklonište“ za vodomjer o svom trošku i brine se da uvijek bude suho, čisto, uredno i pristupačno kako bi se vodomjer mogao popraviti i održavati te očitati potrošnja vode.

„Sklonište“ se izgrađuje prema uputstvu organa upravljanja, odnosno prema važećim tehničkim normativima.

#### Član 25.

„Sklonište“ za vodomjer po pravilu se postavlja neposredno do objekta, a najdalje do 10 metara od objekta.

„Skloništa“ van zgrade moraju imati propisan poklopac od livenog gvožđa ili čeličnog lima.

Ukoliko se „Sklonište“ za vodomjer nalazi unutar zgrade, ono ne smije biti u stambenim, magacinskim ili klozetskim prostorijama.

#### Član 26.

Za kućnu vodovodnu instalaciju odgovara potrošač i održava je o svom trošku.

Hidranti, koji se nalaze u stambenim zgradama smatraju se vodovodnim instalacijama.

Organ upravljanja ne odgovara za štetu koja nastaje potrošačima zbog pogonskih smetnji i kvara na kućnim vodovodnim instalacijama, kao i zbog

prekida snabdijevanja vodom nastalom zbog smetnji iz člana 11.stav 2.ove Odluke, ukoliko ta šteta nije nastala zbog nestručnog ili nesavjesnog rukovanja od strane radnika organa upravljanja.

### **B Obaveze potrošača vode**

#### Član 27.

Potrošač je dužan da svoje vodovodne instalacije zaštiti od oštećenja i kvara, kako bi mogla trajno služiti svojoj namjeni.

Isto tako, potrošač je dužan blagovremeno preduzeti mjere da se priključni vod instalacija zaštiti od smrzavanja.

#### Član 28.

Oštećenja ili smetnje na priključku, koja nastaju krivicom ili nepažnjom potrošača opravljaju se o trošku potrošača, a koja nastanu krivicom ili nepažnjom organa upravljanja opravljaju se na teret organa upravljanja.

#### Član 29.

Svaki kvar i šteta na priključku i vodomjeru potrošač je dužan odmah prijaviti organu upravljanja, a isti je dužan u roku od 24 sata da preduzme mjere radi otklanjanja kvara.

#### Član 30.

Svaki potrošač je dužan da priključne vodovodne instalacije drži u ispravnom stanju, kako bi se spriječilo rasipanje vode i nastajanje drugih šteta, u protivnom, sve nastale štete padaju na teret potrošača.

Vodovodne instalacije ne smiju biti korištene kao uzemljenje za električna postrojenja i naprave.

#### Član 31.

Ukoliko potrošač ni poslije opomene od strane organa upravljanja, ne podnese zahtjev istom za opravku kvara na priključku, organ upravljanja će potrošaču obustaviti isporuku vode.

Popravka oštećene trase vodovodne mreže, odnosno priključka, vrši se na teret korisnika koji je izazvao oštećenje.

Izmještanje trase vodovodne mreže odnosno priključka, a na zahtjev zainteresovane strane zbog radova na izgradnji stambenih, privrednih ili objekata infrastrukture i sl. vrši se o trošku investitora predmetnog objekta.

### **C Očitavanje potrošnje vode**

#### Član 32.

Zabranjeno je spajanje kućnog priključka ispred vodomjera.

Organ upravljanja je dužan prije priključenja objekta na vodovodnu mrežu zapisnički utvrditi ispravnost vodovodnih instalacija objekta i izvršiti dezinfekciju istih na teret potrošača.

Organ upravljanja će odbiti da priključi objekat sa neispravnim vodovodnim instalacijama na vodovodnu mrežu.

#### Član 33.

Organ upravljanja ima isključivo pravo otvaranja i zatvaranja ventila za zatvaranje veze na ulicu kod vodomjera.

Potrošač može zatvoriti ventil iza vodomjera u slučaju kvara ili opravke na kućnoj vodovodnoj instalaciji a o tome mora obavijestiti organ upravljanja.

Zatvaranje ventila vodomjera može izvršiti vlasnik, odnosno korisnik objekta, samo u slučaju kvara vodomjera i ventila iza vodomjera, stim što je dužan da o tome obavijesti organ upravljanja.

#### Član 34.

U cilju kontrole sprovođenja odredaba ove Odluke radnici organa upravljanja imaju pravo da pregledaju vodovodne instalacije, uređaje za povećanje pritiska, uređaje za napajanje centralnog grijanja i druge uređaje, koji mogu nanijeti ili uzrokovati štetu na vodovodnoj mreži.

Radnici mogu vršiti takve preglede na osnovu posebnog ovlaštenja organa upravljanja. Ovlaštenje, uz ličnu kartu, radnici su dužni pokazati i bez posebnog zahtjeva korisnika.

#### Član 35.

Potrošnja vode plaća se po tarifi koju donosi organ upravljanja po važećim propisima, uz predhodno pribavljenu saglasnost Općinskog vijeća.

Potrošenu vodu u predhodnom mjesecu, potrošač je dužan platiti u narednom mjesecu, odnosno po propisima o međusobnom plaćanju.

Zabranjeno je vršiti preprodaju vode u cilju sticanja imovinske koristi.

Ukoliko potrošač plaća vodu po nižoj tarifi utvrđenoj za domaćinstva a koristi vodu za namjene iz više tarife, organ upravljanja će obračunavati ukupni utrošak vode po višoj tarifi za cijeli objekat.

Potrošač ima pravo tražiti provjeru ispravnosti vodomjera, pa će u tom slučaju ovlaštenu radnik organa upravljanja izvršiti skidanje

vodomjera i dostaviti ga nadležnoj ustanovi na ispitivanje.

Ako se kontrolom ustanovi da vodomjer odgovara propisima, potrošač plaća sve troškove koji su nastali u vezi sa njegovim zahtjevom, u protivnom organ upravljanja plaća troškove.

#### Član 36.

U slučaju neispravnog rada vodomjera kao i u drugim slučajevima kada se vodomjerom ne može izmjeriti potrošnja vode, potrošnja će se utvrditi po procjeni ili prosjeku potrošnje vode dotičnog potrošača.

Osnov za procjenu čini srednja potrošnja vode za poslednja 3 mjeseca, kada je vodomjer bio u ispravnom stanju.

Ako nema podataka o srednjoj potrošnji vode ili ako postoje poteškoće u procjenjivanju, procjena će se vršiti prema srednjoj potrošnji za poslednja 3 mjeseca ili za uporedni period predhodne godine.

Ako se potrošnja ni tako ne može odrediti organ upravljanja će utvrditi potrošnju vode upoređivanjem sa drugim sličnim potrošačima .

Potrošnja vode za čišćenje javnih površina (pranje ulica, polijevanje parkova i sl.)ako se ne mjeri vodomjerom, obračunava se na način utvrđen ugovorom između organa upravljanja i potrošača.

Potrošnja vode na javnim česnama i vodoskocima, ako isti koriste vodu iz općinskog vodovoda, mjeri se vodomjerom. Utrošenu vodu plaća podnosilac zahtjeva za otvaranje javne česme odnosno vodoskoka.

#### Član 37.

Vodomjer očitavaju ovlašteni radnici organa upravljanja (u daljem tekstu čitači) po rasporedu koji određuju organ upravljanja, a isti mogu vršiti u vremenu između 7 i 18 sati u ljetnom periodu i u vremenu od 7 do 15 sati u zimskom periodu. Radnici na tim poslovima moraju imati pismeno ovlaštenje organa upravljanja za vršenje tog posla.

Potrošač mora omogućiti očitavanje vodomjera. Ako zbog propusta potrošača, čitač ne bude mogao da izvrši redovno očitavanje, čitač će ostaviti pismenu opomenu u kojoj će biti naznačeno tačno vrijeme naknadnog očitavanja vodomjera .Ako ni tada čitač ne bude mogao da izvrši očitavanje vodomjera, utrošak vode će se procijeniti, a tačan obračun izvršiti pri sledećem očitavanju vodomjera.

#### Član 38.

U zimskom periodu kada su niske temperature, da bi se izbjeglo eventualno smrzavanje vodomjera, a uz saglasnost potrošača, potrošnja vode može se obračunati po procjeni u smislu člana 36. ove Odluke. U tom slučaju definitivni obračun utroška vode vrši se poslije redovnog očitavanja vodomjera.

#### Član 39.

Potrošač je dužan plaćati naknadu za korištenje vode, sve dok organ upravljanja ne podnese pismenu ođavu.

Potrošač mora otkazati potrošnju vode. Otkaz se daje pismeno, a može biti trajan ili privremen.

Potrošač je dužan da kada otkáže potrošnju vode, ispusti vodu iz instalacije da bi se spriječilo eventualno smrzavanje ili rasipanje vode. U takviom slučaju organ upravljanja će zapisnički, bez ikakve naknade, plombirati ventil ispred vodomjera ili fizički zatvoriti priključno mjesto.

#### Član 40.

##### **Potrošnja vode se ne plaća u sledećim slučajevima:**

1. za gašenje požara iz javnih hidranata, ako korisnik nije profesionalno vatrogasno društvo,
2. za gašenje požara iz kućne vodovodne instalacije,
3. ako je voda istekla zbog greške na vodomjeru ili njegovim armaturama, osim slučaju ako je do kvara došlo krivicom potrošača,
4. za snabdijevanje stanovništva vodom u elementarnim nepogodama.

U slučajevima iz tačke 2 i 3. ovog člana potrošač je dužan da izvijesti organ upravljanja odmah a najkasnije u roku od 24. sata.

Po izlasku na lice mjesta radnici organa upravljanja će zapisnički konstatovati potrošnju vode iz tačke 2. i 3. ovog člana kako bi se ona mogla odbiti ili ukupno potrošene vode koja se plaća.

##### **D Štednja vode**

#### Član 41.

Za vrijeme nestašice vode, organ upravljanja će davati uputstva potrošačima, šta treba da preduzmu, da bi se ublažila nestašica vode.

Potrošači su dužni pridržavati se dobijenih uputstava.

#### Član 42.

U slučaju veće nestašice vode zbog suše ili iz bilo kojih drugih razloga, organ upravljanja može, uz saglasnost općinskog Načelnika, donijeti plan ograničenja potrošnje vode, odnosno zabrane potrošnje vode u određene svrhe (pranje automobila, pranje i polijevanje javnih površina i sl.)

U slučaju veće nestašice vode, naročito poslije velikih elementarnih nepogoda, organ upravljanja može, uz suglasnost općinskog Načelnika, uvesti redukciju vode.

O uvođenju redukcije vode, organ upravljanja dužan je tri dana unaprijed obavijestiti potrošače putem lokalnih medija i putem oglasa.

Ograničenje potrošnje vode iz ovog člana ne odnosi se na vatrogasnu službu u slučaju gašenja požara.

#### *E Javne česme*

#### Član 43.

Javne česme, spojene na općinski vodovod, postavlja organ upravljanja na zahtjev Općinskog vijeća, Općinskog načelnika, Mjesne zajednice i zainteresovanih organizacija i građana.

Voda sa javne česme može se koristiti za piće i higijenske potrebe građana.

Potrošnju vode, postavljanje i održavanje javne česme plaća naručilac.

#### Član 44.

Iz javnih hidranata mogu uzimati vodu samo ovlaštene organizacije.

Potrošnja vode iz hidrantske mreže u pravilu se mjeri vodomjerom koji postavlja organ upravljanja. Nastale troškove nabavke i postavljanja vodomjera na hidrante snosi organ upravljanja.

Javna vatrogasna služba ima pravo uzimati vodu za gašenje požara i za vrijeme ograničenja potrošnje vode. Vatrogasna služba može trošiti vodu za svoje vježbe samo u sporazumu sa organom upravljanja.

Vatrogasna služba je dužna izvijestiti organ upravljanja o količini utrošene vode za gašenje požara kao i utrošenoj vodi za izvođenje vježbi.

Ostale organizacije moraju imati posebno odobrenje organa upravljanja da mogu koristiti vodu pomoću hidrantskog nastavka na određenom mjestu. Svaki takav hidrantski nastavak mora biti prijavljen organu upravljanja i posebno obilježen.

Uzimanje vode bez odobrenja organa upravljanja nije dozvoljeno. Utrošena voda se plaća

po tarifi ili na osnovu procjene, ako se ne može mjeriti vodomjerom ili na hidrantskom nastavku, osim u slučajevima predviđenim u članu 40. ove Odluke.

#### Član 45.

Potrošači vode iz predhodnog člana, poslije upotrebe javnog hidranta, dužni su ga ostaviti u ispravnom stanju.

Ako hidrant zbog nepravilne upotrebe bude oštećen, korisnik je dužan platiti opravku.

#### *F Obustava isporuke vode*

#### Član 46.

Organ upravljanja ima pravo da potrošačima obustavi isporuku vode u sledećim slučajevima:

1. Kada potrošač otkáže potrošnju vode,
2. Kada se raniji potrošač odjavi, a novi potrošač još nije izvršio prijavu,
3. Kada se utvrdi da je oštećena plomba na ventilu i vodomjeru,
4. Kada nastane veći kvar ili smetnja na kućnoj vodovodnoj instalaciji,
5. Ako je sklonište vodomjera zagađeno, zatrpano i nepristupačno, a nalazi se unutar građevinske parcele potrošača, a potrošač nije otklonio nedostatke i poslije pismene opomene od strane organa upravljanja,
6. Ako potrošač ne plati račun za utrošenu količinu vode u roku propisanom ovom Odlukom,
7. Ako potrošač prekrši propisane mjere i naredbe o štednji vode,
8. Ako ne bude određen jedan predstavnik kada ima više organa upravljanja, odnosno vlasnika objekta na jednom priključku-vodomjeru,
9. Kada potrošač priključi nove interne vodovodne instalacije ili izvrši rekonstrukciju postojećih ili ako dozvoli da se na njegov priključak priključi drugi objekat, a za radove i postupke nema pismeno odobrenje organa upravljanja,
10. Ako službenom licu onemogućí očitavanje vodomjera i nakon pismene opomene od strane organa upravljanja,
11. Ako potrošač namjerno pokvari vodomjer,
12. Na nalog nadležnog inspektora,
13. Ako potrošač nije izmirio obaveze po članu 19. ove Odluke, odnosno ako nema pribavljenu saglasnost nadležnog organa za priključak na vodovodnu mrežu.
14. Ako potrošač nije ugradio vodomjer u skladu sa članom 22 stav 5 ove Odluke.



U slučajevima iz ovog člana dovod vode za snabdijevanje potrošača ostaje zatvoren sve dok se ne otklone uzroci zbog kojih je obustavljeno snabdijevanje potrošača vodom. Troškovi zatvaranja i ponovnog otvaranja padaju na teret potrošača.

#### IV VODOOPSKRBNI OBJEKTI U SEOSKIM NASELJIMA

##### Član 47.

Vodoopskrbnim objektima u seoskim naseljima, u smislu ove Odluke smatraju se: grupni vodovodi, mjesni vodovodi, javni bunari i javne česme (u daljem tekstu: seoski vodovodi).

##### Član 48.

Izvorišta voda koja se zahvataju radi snabdijevanja vodom za piće seoskog stanovništva putem seoskih vodovoda moraju, po pravilu, imati dovoljne količine zdravstveno ispravne vode, kako bi se u svako doba godine moglo obezbijediti neprekidno snabdijevanje vodom stanovnika naselja.

Kaptaža i rezeorvari, koji su u smislu ove Odluke sastavni dio seoskog vodovoda, a koji služe za prihvatanje i akumuliranje vode za piće, moraju imati propisane izolacije i ostale potrebne uređaje.

Kapacitet rezeorvara seoskog vodovoda treba da obezbijedi dovoljnu količinu vode za dnevnu potrošnju korisnika i rezervu za gašenje požara.

Seoski vodovod mora imati ugrađen i propisno baždaren uređaj za mjerenje količina iskorištene vode na odvodu iz rezeorvara, a ako ima više odvoda iz rezeorvara, na svakom odvodu.

Ako je kapacitet izvorišta veći od stvarnih potreba korisnika seoskog vodovoda (za piće, sanitarne potrebe, napajanje stoke i sl.) na rezeorvaru tog seoskog vodovoda ugrađuje se česma sa betonskim koritom za javnu upotrebu (javna česma).

##### Član 49.

Javni bunar je objekat sa odgovarajućom zaštitnom zonom i odgovarajućim uređajima koji služe za snabdijevanje vodom za piće najmanje dva domaćinstva u seoskom naselju.

##### Član 50.

Javna česma je objekat sa odgovarajućom zaštitnom zonom i odgovarajućim uređajima koji

služe za snabdijevanje vodom za piće stanovnika naselja i prolaznika.

Javna česma može biti izgrađena i van seoskog naselja.

Održavanju javnih česmi u selima brinu se stanovnici seoskog naselja, a održavanje javnih česmi van seoskih naselja brine se općina.

##### Član 51.

Ukoliko su prilikom izgradnje seoskog vodovoda, investitori grupa građana, isti su dužni sačiniti ugovor o izgradnji, održavanju i iskorištavanju seoskog vodovoda, kojim se regulišu sva bitna pitanja od značaja za predmetni vodoopskrbni objekat.

Predmetni ugovor potpisuju svi investitori tog objekta, isti se ovjerava u Sudu ili općini i jedan primjerak tog ugovora se dostavlja općinskoj službi nadležnoj za poslove vodoprivrede.

##### Član 52.

Licima koja nisu učestvovala u izgradnji seoskog vodovoda, može se odobriti priključak na seoski vodovod na osnovu vodoprivredne dozvole koju donosi nadležna općinska uprava.

U postupku izdavanja vodoprivredne dozvole nadležna služba je obavezna pribaviti stručno mišljenje od ovlaštenog pravnog ili fizičkog lica da postoje dovoljne količine vode za nove korisnike, ako to pitanje nije riješeno postojećom projektnom dokumentacijom.

Vodoprivrednom dozvolom odobrit će se priključak na seoski vodovod ako seoski vodovod, s obzirom na količinu vode za piće, može da zadovolji i potrebe interesanata i ako se njegovo snabdijevanje vodom za piće ne može izvršiti na drugi ekonomičan i racionalan način.

Lice kome je vodoprivrednom dozvolom odobreno priključenje na seoski vodovod dužno je prije priključenja odnosno korištenja vode putem ugovora sa vlasnicima seoskog vodovoda regulisati snošenje srazmjernog dijela troškova izgradnje seoskog vodovoda i srazmjernog dijela troškova održavanja i iskorištavanja istog.

Srazmjerni dio troškova koje lice, kome je vodoprivrednom dozvolom odobreno priključenje na seoski vodovod, treba da snosi u smislu stava 3. ovog člana, ne može biti veći od učešća svakog pojedinog investitora u izgradnji ili rekonstrukciji seoskog vodovoda odnosno od učešća svakog pojedinog vlasnika seoskog vodovoda u troškovima održavanja i iskorištavanja tog objekta.

Ako lice kojem je vodoprivrednom dozvolom odobreno priključenje na seoski vodovod

ne zaključi ugovor sa vlasnicima seoskog vodovoda, o troškovima priključka na seoski vodovod, u smislu stava 3.ovog člana, spor rješava nadležni sud.

#### Član 53.

Stanovnici koji su seoski vodovod izgradili vlastitim sredstvima dužni su da trajno obezbjeđuju potrebna finansijska sredstva i druge uslove za održavanje i funkcionisanje tih objekata u skladu sa njihovom prirodom i namjenom, za uspostavljanje i održavanje zona sanitarne zaštite izvorišta vode za seoske vodovode i za vršenje minimalnog broja propisanih zdravstvenih pregleda ispravnosti vode za piće iz tih objekata.

Vlasnici seoskog vodovoda mogu isti predati na upravljanje organu upravljanja registrovanom za snabdijevanje stanovnika i privrede vodom , o čemu su dužni sačiniti poseban ugovor, i u tom slučaju obaveza iz stava 1.ovog člana prelazi na to pravno lice.

#### Član 54.

Ukoliko se ustanovi da stanovnici, vlasnici seoskih vodovoda, ne izvršavaju obaveze iz člana 53.stav 1.ove Odluke, općinska uprava nadležna za poslove vodoprivrede naredit će izvršenje tih obaveza i odrediti rok za njihovo izvršenje odnosno postupanje u skladu sa uslovima i obavezama utvrđenim u vodoprivrednoj dozvoli izdatoj za taj objekat.

Ako se ustanovi da stanovnici odnosno vlasnici seoskog vodovoda nisu izvršili svoje obaveze ili ih nisu izvršili u roku u skladu sa rješenjem iz stava 1. ovog člana, nadležna općinska služba za poslove vodoprivrede izdat će vodoprivredni nalog.

### V KAZNENE ODREDBE

#### Član 55.

Novčanom kaznom u iznosu od 1.000,00 KM do 5.000,00 KM kaznit će se pravno lice:

01. Ako bez odobrenja organa upravljanja izvrši priključenje objekta na vodovodnu mrežu (čl.19 i 21.ove Odluke).

02. Ako direktno spoji svoje individualne uređaje za snabdijevanje vodom sa uređajima javnog vodovoda (čl.58).

03. Ako ošteti plombu na ventilu i vodomjeru (čl.12.stav 2.)

04. Ako kućnu vodovodnu instalaciju neodržava u ispravnom stanju (čl.30).

05. Ako priključi kućne vodovodne instalacije na općinski vodovod bez utvrđenih tehničkih uslova organa upravljanja,(čl.17),

06. Ako namjerno ošteti instalacije javne vodovodne mreže,vodomjer ili plombu na vodomjeru (čl.28.),

07. Ako odmah ne prijavi organu upravljanja kvar ili štetu na priključku ili vodomjeru (čl.29),

08. Ako samovoljno izvrši spajanje na kućni priključak ispred vodomjera(čl.23.),

09. Ako se bavi preprodajom vode u cilju sticanja imovinske koristi (čl.35.stav3),

10. Ako vlasnik postupi suprotno članu 24.ove Odluke,

11. Ako vodu,koju troši po nižoj tarifi upotrebljava u druge svrhe za koje je propisana viša tarifa,a o tome ne pribavi odobrenje organa upravljanja (čl.35.stav 4.),

12. Ako vodu sa javne česme koristi za druge svrhe, ne za piće i higijenske potrebe (član 43. stav 2.),

13. Ako uzima vodu iz javnih hidranata bez odobrenja organa upravljanja (član 44. stav 6.).

Za učinjeni prekršaj iz stava 1.ovog člana kaznit će se i odgovorno lice u pravnom licu novčanom kaznom od 300,00 KM do 2.000,00KM.

#### Član 56.

Za učinjeni prekršaj iz člana 55.stav 1.ove Odluke kaznit će se fizičko lice novčanom kaznom u iznosu od 500,00 KM do 2.000,00 KM.

#### Član 57.

Novčanom kaznom od 500,00 KM do 3.000,00 KM kaznit će se za prekršaj organ upravljanja :

1. Ako krivicom organa upravljanja dođe do prekida snabdijevanja potrošača vodom u cijelom gradu ili većem dijelu grada ili naselja (Čl.11.stav1.),

2. Ako blagovremeno ne obavijeti potrošača o prekidu snabdijevanja vodom u slučaju izvođenja radova na rekonstrukciji ili većim prepravkama vodovoda (Čl.11.stav 4.)

3. Ako u roku od 24.sata o prijavi potrošača ne preduzme mjere na otklanjanju kvara ili štete na priključku ili vodomjeru (čl.29),

4. Ako izvrši priključenje objekta na općinski vodovod ukoliko investitor predmetnog objekta nije ispunio obaveze iz čl.18. ove Odluke.

Za prekršaj iz stava 1.ovog člana kaznit će se odgovorno lice u organu upravljanja novčanom kaznom od 300,00 KM do 1.000,00 KM.

## VI ZAVRŠNE ODREDBE

### Član 58.

Individualni uređaji za snabdijevanje vodom za piće ne smiju biti direktno spojeni sa uređajima javnog vodovoda iz člana 2. ove Odluke.

Na općinsku vodovodnu mrežu, po pravilu, mogu se pripajati samo oni objekti, koji su povezani sa općinskom kanalizacionom mrežom ili propisno urađenom septičkom jamom.

### Član 59.

Zaštita izvorišta iz člana 2. ove Odluke i javnih bunara vrši se uspostavljanjem i održavanjem zona sanitarne zaštite, čije se veličine i granice utvrđuju vodoprivrednom saglasnošću, odnosno vodoprivrednom dozvolom.

Prilikom utvrđivanja uslova za korištenje i održavanje zaštitnih zona, kao i vrste zaštitne zone, primjenjuju se odredbe Federalnog i Kantonalnog Zakona o vodama.

### Član 60.

Vlasnici postojećih seoskih vodovoda dužni su u roku od godinu dana od dana stupanja na snagu ove Odluke, za iste pribaviti vodoprivrednu dozvolu.

### Član 61.

Općinska uprava nadležna za poslove vodoprivrede dužna je da ustroji i trajno vodi evidenciju o seoskim vodovodima i da blagovremeno registruje sve promjene od značaja za seoske vodovode.

### Član 62.

O sprovođenju ove Odluke starat će se općinska služba nadležna za poslove vodoprivrede, općinska služba nadležna za komunalne poslove, organ upravljanja i nadležne općinske inspeksijske službe.

### Član 63.

Ova Odluka stupa na snagu danom objavljivanja u "Službenom glasniku općine Kalesija".

## 21

Na osnovu člana 3. Zakona o komunalnim djelatnostima ("Sl. list SRBiH" br. 20/90), člana 4. 19. 26. 27. 28 i 29. Zakona o vodama ("Sl. novine TK-a", br. 15/99) i člana 41. Statuta općine Kalesija („Službeni glasnik općine Kalesija” br. 7/03), Općinsko vijeće Kalesija na sjednici održanoj dana 28.02.2005. godine, d o n o s i

## ODLUKU

### o vodoprivrednim objektima za zaštitu voda na području općine Kalesija

#### Član 1.

Ovom Odlukom propisuju se načini i uslovi za izgradnju, upravljanje, održavanje, korištenje i zaštitu vodoprivrednih objekata za zaštitu voda na području općine Kalesija (u daljem tekstu Općine).

#### I OPŠTE ODREDBE

#### Član 2.

Vodoprivredni objekti za zaštitu voda na području općine su: kanalizacione mreže, uređaji za tretman-prečišćavanje otpadnih voda, odlagališta za otpadne materije i drugi objekti te namjene.

Kanalizacione mreže na području općine mogu biti:

1. Općinska kanalizaciona mreža, koja je u vlasništvu Općine, a služi za odvodnju otpadnih voda u gradu Kalesija, prigradskim i ostalim naseljima.

2. Seoske kanalizacione mreže, koje su u vlasništvu stanovnika koji su ih izgradili za svoje potrebe a služe za odvodnju otpadnih voda seoskih naselja.

#### Član 3.

Pojedini pojmovi upotrebljeni u ovoj Odluci imaju sledeća značenja:

- Kanalizaciona mreža podrazumjeva objekte za prihvatanje i odvod otpadnih voda sa područja naselja posebnim kanalima. Početak je sa prihvatnim mjestima (sabirni šahtovi za prihvatanje otpadne vode iz kućne kanalizacije, poslovnog objekta, stambeno-poslovnog objekta, uličnih slivnika i slično), obuhvata glavne kolektore i kolektore nižeg reda (krakove) kojim se otpadna voda odvodi do potrošača ili izlivnog mjesta, a završava izlivnim objektom (nakon prečišćavanja

otpadna voda se izliva u vodotok ili se na drugi način vrši tretman otpadne vode).

- Kućnom kanalizacionom instalacijom smatraju se instalacije koje služe za prihvatanje i transport otpadnih voda od sanitarnih uređaja u objektu i drugih prijemnika (krovovi, dvorišni slivnici i slično) do priključnog šahta na glavnom kolektoru ili kolektoru nižeg reda.

- Individualnom kanalizacijom za tretiranje otpadnih voda smatraju se svi kanalizacioni uređaji i objekti koji nisu povezani sa općinskom ili seoskom kanalizacionom mrežom a služe za prihvatanje otpadnih voda najviše jednog objekta.

## II IZGRADNJA I REKONSTRUKCIJA VODOPRIVREDNIH OBJEKATA ZA ZAŠTITU VODA

### Član 4.

Izgradnja i rekonstrukcija objekata i uređaja za odvodnju i prečišćavanje otpadnih voda na području općine Kalesija vrši se na način i pod uslovima propisanim federalnim Zakonom o vodama („Sl. novine FBiH“, br. 18/98), kantonalnim Zakonom o vodama („Sl. novine TK“, br. 15/99), Zakonom o komunalnim djelatnostima („Sl. list SRBiH“ br. 20/90), Zakonom o prostornom uređenju, Zakonom o građenju, odredbama ove Odluke i drugim propisima koji regulišu ovu oblast.

Odobrenje za radove iz predhodnog stava, na zahtjev investitora, daje organ uprave nadležan za urbanizam i građenje, a po predhodno pribavljenoj vodoprivrednoj saglasnosti od strane nadležnog organa.

Investitor za izgradnju općinske kanalizacione mreže je općina, a investitor za izgradnju seoskih kanalizacionih mreža može biti mjesna zajednica, grupa građana odnosno građanin pojedinac.

Općina može biti sufinansijer kod izgradnje seoskih kanalizacionih mreža, ukoliko je to u skladu sa programom razvoja lokalne infrastrukture i drugih akata donesenim od strane Općinskog vijeća a u slučaju ako će upravljanje tim objektima biti povjereno javnom preduzeću nadležnom za te poslove.

## III UPRAVLJANJE I ODRŽAVANJE OPĆINSKOM KANALIZACIONOM MREŽOM UREĐAJIMA ZA PREČIŠĆAVANJE OTPADNIH VODA NA ISTOJ

### Član 5.

Postojeća općinska kanalizaciona mreža za prečišćavanje otpadnih voda je javno dobro u vlasništvu Općine Kalesija, koji se mora

knjigovodstveno ustrojiti i procijeniti vrijednost istog, kako bi se u skladu sa Zakonskim propisima mogla izdvojiti sredstva na ime amortizacije, u cilju razvoja samog sistema.

### Član 6.

Za utvrđivanje knjigovodstvene vrijednosti općinske kanalizacione mreže i uređaja za prečišćavanje otpadnih voda, Općinski načelnik će formirati komisiju koja ima zadatak da utvrdi stvarno stanje u kome se trenutno nalaze kanalizacione mreže i uređaji za prečišćavanje otpadnih voda i vrijednost istih, na osnovu čega će se ustrojiti evidencija propisana u članu 5. ove Odluke.

### Član 7.

Općina može pravo upravljanja i održavanja nad općinskom kanalizacionom mrežom i uređajima za prečišćavanje otpadnih voda, povjeriti Javnom preduzeću registrovanom za tu djelatnost ili nekom drugom pravnom licu registrovanom za tu djelatnost (Odvodnja i prečišćavanje otpadnih voda - u daljem tekstu organ upravljanja).

Organ upravljanja je dužan da iz cijene koštanja otpadne vode iz općinske kanalizacione mreže obezbijedi troškove tekućeg i investicionog održavanja kanalizacione mreže i uređaja za prečišćavanje otpadnih voda u skladu sa važećim normativima i standardima, izdvajanje sredstava za amortizaciju, otplatu anuiteta za eventualne kredite, korištene za izgradnju, rekonstrukciju i sanaciju kanalizacione mreže, objekata i uređaja za prečišćavanje otpadnih voda i druge obaveze utvrđene Zakonom i ovom Odlukom.

### Član 8.

Prenos prava upravljanja nad općinskom kanalizacionom mrežom i uređajima za prečišćavanje voda, čije je vlasnik općina Kalesija, uredit će se posebnom Odlukom Općinskog vijeća Kalesija.

### Član 9.

Obaveza organa upravljanja je:

1. Da neprekidno održava u ispravnom stanju kanalizacionu mrežu, objekte na istoj i objekte i uređaje za prečišćavanje otpadnih voda.
2. Da se stara o proširenju kanalizacione mreže,
3. Da u skladu sa Zakonom, ovom Odlukom vrši priključenje objekata na kanalizacionu mrežu.
4. Da u skladu sa Zakonom i tehničkim uputama za rukovanje uređajima za prečišćavanje

otpadnih voda vrši uklanjanje i deponovanje prikupljenog čvrstog otpada,

5. Da u skladu sa Zakonskim i podzakonskim aktima vrši obračun i naplatu otpadne vode od korisnika.

6. Da u roku od tri mjeseca od dana stupanja na snagu ove Odluke donese Pravilnik o graničnim vrijednostima opasnih i štetnih materija i tvari koje se ispuštaju u općinsku kanalizacionu mrežu, koji su obavezni ispoštovati svi korisnici općinske kanalizacione mreže, na koji je obavezan pribaviti saglasnost Općinskog Vijeća Kalesija.

#### Član 10.

Prilikom izvođenja potrebnih radova radi izgradnje, proširenja, rekonstrukcije i popravke kanalizacione mreže, investitor odnosno izvođač tih radova dužan je sve ostale neophodne radove u smislu dovođenja u prvobitno stanje nastale tom prilikom na prilazima, trotoarima, kolovozima, ogradama (putnim i dvorišnim) i objektima druge infrastrukture plati iznos u vrijednosti potrebnih radova na sanaciji nastalih oštećenja na poseban podračun općine predviđen za troškove uređenja građevinskog zemljišta. Iznos navedenih sredstava će odrediti tročlana komisija sačinjena od stručnih lica zaposlenih na pomenutim poslovima.

### **A Priključenje na općinsku kanalizacionu mrežu**

#### Član 11.

Svaki stambeni, stambeno-poslovni, poslovni, vikend objekat, mora imati poseban priključak na kanalizacionu mrežu.

Organ upravljanja može dozvoliti da se preko jednog priključka spoji više objekata s tim da se propisane obaveze moraju ispoštovati za svaki objekat posebno.

#### Član 12.

Investitor može priključiti objekat na kanalizacionu mrežu nakon pribavljanja odobrenja za građenje objekta, odobrenja za priključenje objekta na kanalizacionu mrežu izdatog od strane organa upravljanja i izmirene priključne takse.

Postupak oko podnošenja zahtjeva za dobijanje priključka na kanalizacionu mrežu propisuje organ upravljanja, u skladu sa ZUP-u. Ni u kom slučaju se ne može objekat priključiti na kanalizacionu mrežu bez odobrenja za građenje objekta.

Organ upravljanja je dužan podnosiocu zahtjeva dati:

- uslove i tehničke podatke potrebne za izradu projektne dokumentacije kućne kanalizacione instalacije,

- saglasnost za priključak objekta na općinsku kanalizacionu mrežu, ukoliko je projektna dokumentacija urađena na osnovu datih uslova i tehničkih podataka uslučaju ako postoje tehničke mogućnosti za priključenje.

#### Član 13.

Prije izvođenja priključka na općinsku kanalizacionu mrežu, potrošači su dužni platiti posebnu priključnu taksu.

Sredstva prikupljena po ovom osnovu uplaćivat će se na račun općine Kalesija sa naznakom „uplata priključne takse na kanalizacionu mrežu“, a koristit će se isključivo za rekonstrukciju, proširenje ili otplatu anuiteta za kredite obezbijeđene za izgradnju općinske kanalizacione mreže i uređaja za prečišćavanje otpadnih voda..

Obračun visine priključne takse, shodno članu 15. ove Odluke, vršit će Općinska služba nadležna za komunalne poslove, a na prijedlog organa upravljanja, prilikom izdavanja odobrenja za priključenje objekta na općinsku kanalizacionu mrežu.

Organ upravljanja je dužan podnositi izvještaj nadležnoj općinskoj službi za komunalne poslove svaka 3 mjeseca o broju izvršenih priključaka sa svim neophodnim podacima.

#### Član 14.

Visina priključne takse za stambene objekte (do 200m<sup>2</sup> korinog prostora) iznosi 500,00 KM, stanove u zgradama sa više od tri stambene jedinice, pomoćnim objektima - garaže iznosi 200,00 KM, a za objekte javnih ustanova (škole, domovi zdravlja, domovi kulture, i sl.) utvrđuju se u visini od 1,00 KM/m<sup>2</sup> korisne površine objekta s tim što visina priključne takse ne može biti manja od 500,00 KM.

Visina priključne takse za objekte poslovne i stambeno-poslovne namjene utvrđuje se u visini od 2,00 KM/m<sup>2</sup> korisne površine poslovnog prostora, stim što ova taksa ne može biti manja od 500,00 KM za dodavanje vrijednosti iz stava 1. ovog člana. Za poslovne objekte tipa auto-praonice iznosi 750,00 KM bez obzira na veličinu tog objekta.

Priključna taksa u slučaju promjene namjene objekta ili dijela tog objekta plaća se prema razlici cijene priključne takse propisane za raniju namjenu tog objekta i cijene priključne takse propisane za namjenu objekta koja se odobrava.

Član 15.

Ukoliko potrošači ličnim učešćem grade krak općinske kanalizacione mreže, isti predhodno moraju pribaviti pismenu saglasnost organa upravljanja, čiji je sastavni dio obavezno predmjer i predračun potrebnih radova, na osnovu čega će isti biti oslobođeni plaćanja priključne takse (ukoliko visina pojedinačnih davanja svakog učesnika prelazi visinu priključne takse iz predhodnog člana), ili dijela priključne takse (ukoliko je visina učešća manja od visine priključne takse, taksa se umanjuje za visinu učešća).

Za objekte čiji su investitori Općina, vatrogasne, vjerske i humanitarne organizacije može se izvršiti oslobađanje od plaćanja takse o čemu će općinski Načelnik donijeti posebnu Odluku.

Ukoliko se na bilo koji način utvrdi da je stvarno izgrađena površina objekta veća od površine na osnovu koje je ranije izračunata visina priključne takse, investitor objekta je dužan uplatiti razliku između ranije obračunate visine priključne takse i visine priključne takse izračunate za stvarnu površinu objekta.

Član 16.

Zabranjeno je, bez odobrenja nadležnog organa vršiti priključivanje objekata na općinsku kanalizacionu mrežu.

Ako se takav priključak izvede organ upravljanja će izdati vodoprivredni nalog na osnovu kojeg će ga odmah isključiti. Troškovi isključenja objekta sa općinske kanalizacione mreže padaju na teret lica koje se bez odobrenja priključilo.

Član 17.

Za kućnu kanalizacionu instalaciju odgovara potrošač i održava je o svom trošku.

**B Obaveze korisnika općinske kanalizacione mreže**

Član 18.

Oštećenja ili smetnje na priključku, koja nastaju krivicom ili nepažnjom korisnika otklanjaju se o trošku potrošača, a koja nastanu krivicom ili nepažnjom organa upravljanja opravljaju se na teret organa upravljanja.

Član 19.

Svaki kvar i šteta na priključku (zapušenje, pucanje cijevi i dr.) korisnik je dužan odmah prijaviti organu upravljanja, a isti je dužan

najkasnije u roku od 24 sata da preduzme mjere radi otklanjanja kvara.

Član 20.

Zabranjeno je u kanalizacionu mrežu ispuštati otpadne vode ako iste sadrže tvari koje bitno utiču na postupak prečišćavanja otpadnih voda, odnosno tvari koje ne udovoljavaju propisanim uslovima iz Pravilnika iz člana 9. tačka 6. ove Odluke.

U slučaju da otpadne vode ne udovoljavaju uslovima iz Pravilnika, korisnik općinske kanalizacione mreže je dužan obezbijediti predtretman otpadnih voda, kako bi zadovoljio te uslove.

Član 21.

U cilju kontrole sprovođenja ove Odluke radnici organa upravljanja imaju pravo da pregledaju kanalizacione instalacije.

Radnici mogu vršiti takve preglede na osnovu posebnog ovlaštenja organa upravljanja.

Ovlaštenje, uz ličnu kartu, radnici su dužni pokazati i bez posebnog zahtjeva korisnika.

**IV VODOPRIVREDNI OBJEKTI ZA ZAŠTITU VODA U SEOSKIM NASELJIMA**

Član 22.

Vodoprivrednim objektima za zaštitu voda u seoskim naseljima, u smislu ove Odluke smatraju se kanalizacione mreže koje služe za prijem i odvodnju otpadnih voda u seoskim naseljima i uređaji za prečišćavanje otpadnih voda i u izuzetnim slučajevima općinska kanalizaciona mreža.

Član 23.

Ukoliko su prilikom izgradnje seoske kanalizacione mreže, investitori grupa građana, isti su dužni sačiniti ugovor o izgradnji, održavanju i iskorištavanju seoske kanalizacione mreže, kojim se regulišu sva bitna pitanja od značaja za predmetnu kanalizacionu mrežu.

Predmetni ugovor potpisuju svi investitori tog objekta, isti se ovjerava u Sudu ili općini i jedan primjerak tog ugovora se dostavlja općinskoj službi nadležnoj za komunalne poslove i vodoprivredu.

Član 24.

Licima koja nisu učestvovala u izgradnji seoske kanalizacione mreže, može se odobriti priključak na seosku kanalizacionu mrežu na

osnovu vodoprivredne dozvole koju donosi nadležna općinska uprava.

U postupku izdavanja vodoprivredne dozvole nadležna služba je obavezna pribaviti stručno mišljenje od ovlaštenog pravnog ili fizičkog lica da postoje dovoljni kapaciteti za nove korisnike, ako to pitanje nije riješeno postojećom projektnom dokumentacijom.

Vodoprivrednom dozvolom odobrit će se priključak na seosku kanalizacionu mrežu ako seoska kanalizaciona mreža, s obzirom na njen kapacitet, može da zadovolji i potrebe interesanata i ako se njihova odvodnja otpadnih voda ne može izvršiti na drugi ekonomičan i racionalan način.

Lice kome je vodoprivrednom dozvolom odobreno priključenje na seosku kanalizacionu mrežu dužno je prije priključenja na istu putem ugovora sa vlasnicima seoske kanalizacione mreže regulisati snošenje srazmjernog dijela troškova izgradnje seoske kanalizacione mreže i srazmjernog dijela troškova održavanja i iskorištavanja iste.

Srazmjerni dio troškova koje lice, kome je vodoprivrednom dozvolom odobreno priključenje na seosku kanalizacionu mrežu, treba da snosi u smislu stava 3.ovog člana, ne može biti veći od učešća svakog pojedinog investitora u izgradnji ili rekonstrukciji seoske kanalizacione mreže, odnosno od učešća svakog pojedinog vlasnika seoske kanalizacione mreže u troškovima održavanja i iskorištavanja tog objekta.

Ako lice kojem je vodoprivrednom dozvolom odobreno priključenje na seosku kanalizacionu mrežu ne zaključi ugovor sa vlasnicima seoske kanalizacione mreže, o troškovima priključka na istu, u smislu stava 3.ovog člana, spor rješava nadležni sud.

#### Član 25.

Stanovnici koji su seosku kanalizacionu mrežu izgradili vlastitim sredstvima dužni su da trajno obezbjeđuju potrebna finansijska sredstva i druge uslove za održavanje i funkcionisanje tih objekata u skladu sa njihovom prirodom i namjenom.

Vlasnici seoske kanalizacione mreže mogu istu predati na upravljanje preduzeću registrovanom da se bavi odvodnjom i prečišćavanjem otpadnih voda, o čemu su dužni sačiniti poseban ugovor, i u tom slučaju obaveza iz stava 1. ovog člana prelazi na to pravno lice.

#### Član 26.

Ukoliko se ustanovi da stanovnici, vlasnici seoske kanalizacione mreže, ne izvršavaju obaveze iz člana 26.stav 1.ove Odluke, općinska uprava

nadležna za komunalne poslove i vodoprivrede naredit će izvršenje tih obaveza i odrediti rok za njihovo izvršenje odnosno postupanje u skladu sa uslovima i obavezama utvrđenim u vodoprivrednoj dozvoli izdatoj za taj objekat.

Ako se ustanovi da stanovnici odnosno vlasnici seoske kanalizacione mreže nisu izvršili svoje obaveze ili ih nisu izvršili u roku i u skladu sa rješenjem iz stava 1. ovog člana, nadležna općinska služba za poslove vodoprivrede izdat će vodoprivredni nalog.

## V KAZNE NE ODREDBE

### Član 27.

Novčanom kaznom u iznosu od 1.000,00 KM do 5.000,00 KM kaznit će se pravno lice:

1. Ako bez odobrenja organa upravljanja izvrši priključenje objekta na općinsku kanalizacionu mrežu (čl.12 i 17. ove Odluke).
2. Ako odmah ne prijavi organu upravljanja kvar ili štetu na priključku (čl.20. ove Odluke)
3. Ako u kanalizacionu mrežu ispušta materije i tvari koje bitno utiču na postupak prečišćavanja otpadnih voda (čl.21. ove Odluke)
4. Ako namjerno ošteti instalacije općinske kanalizacione mreže (čl.19. ove Odluke)
5. Ako ne izgradi nepropusnu septičku jamu i na istu ne priključi objekat u roku propisanom u članu 32. ove Odluke

Za učinjeni prekršaj iz stava 1. ovog člana kaznit će se i odgovorno lice u pravnom licu novčanom kaznom od 300,00 KM do 2.000,00KM.

### Član 28.

Za učinjeni prekršaj iz člana 27. ove Odluke kaznit će se fizičko lice novčanom kaznom u iznosu od 500,00 KM do 2.000,00 KM.

### Član 29.

Novčanom kaznom od 500,00 KM do 3.000,00 KM kaznit će se za prekršaj organ upravljanja koji vrši upravljanje kanalizacionom mrežom ako :

1. Ako u roku od 24.sata po prijavi korisnika ne preduzme mjere na otklanjanju kvara ili štete na priključku (čl.20. ove Odluke),
2. Ako izvrši priključenje objekta na kanalizacionu mrežu ukoliko investitor predmetnog objekta nije ispunio obaveze iz čl.15.ove Odluke.

Za prekršaj iz stava 1.ovog člana kaznit će se odgovorno lice u organu upravljanja novčanom kaznom od 300,00 KM do 1.000,00 KM.

## VI ZAVRŠNE ODREDBE

### Član 30.

Vlasnici postojećih seoskih kanalizacionih mreža dužni su u roku od godinu dana od dana stupanja na snagu ove Odluke, za iste pribaviti vodoprivrednu dozvolu.

### Član 31.

Popravka oštećene kanalizacione mreže, odnosno priključka vrši se na teret fizičkog lica ili pravnog lica koje je izazvalo oštećenje.

Izmještanje trase kanalizacione mreže odnosno priključka, a na zahtjev zainteresovane strane zbog izvođenja radova na izgradnji stambeni, stambeno-poslovnih, privrednih, infrastrukturnih i drugih objekata vrši se o trošku investitora objekta.

### Član 32.

Pravna lica i građani vlasnici stambenih, stambeno-poslovnih, privrednih, pomoćnih i vikend objekata, gdje ne postoji mogućnost priključenja na kanalizacionu mrežu, dužni su izgraditi vodonepropusne septičke jame i na iste priključiti te objekte, u roku od godinu dana od dana stupanja na snagu ove Odluke, i obezbijediti redovno čišćenje septičkih jama prema potrebi a najmanje dva puta godišnje od strane specijalizovanog pravnog lica registrovanog za obavljanje ove djelatnosti.

### Član 33.

Općinska uprava nadležna za poslove vodoprivrede dužna je da ustroji i trajno vodi evidenciju o seoskim kanalizacijama i da blagovremeno registruje sve promjene od značaja za seoske kanalizacione mreže.

### Član 34.

O sprovođenju ove Odluke starat će se općinska služba nadležna za poslove vodoprivrede, općinska služba nadležna za komunalne poslove, organ upravljanja i nadležne općinske inspeksijske službe.

### Član 35.

Ova Odluka stupa na snagu danom objavljivanja u "Službenom glasniku općine Kalesija".

## 22

Na osnovu člana 19. stav 1. tačka 2. a u vezi sa članom 122. stav 3. Statuta općine Kalesija («Sl. glasnik općine Kalesija» broj: 7/03), Općinsko vijeće Kalesija na sjednici održanoj dana 28.02.2005.godine, d o n o s i

### ODLUKU

o stambenom zbrinjavanju lica koja se nalaze u stanju socijalne potrebe

#### I

Ovom Odlukom uređuje se postupak dodjele na korištenje stambenih jedinica u vlasništvu općine Kalesija licima koja se nalaze u stanju socijalne potrebe, kriteriji po kojima će se dodjela stambenog prostora vršiti kao i stambeni prostor koji će biti predmet raspodjele.

#### II

Status korisnika stambenog prostora stiču osobe koje se same ili sa članovima svoje porodice nalaze u stanju socijalne potrebe, ukoliko nemaju sredstava za održavanje, a kojima je usled neriješenog stambenog pitanja ili poremećenih porodičnih odnosa, potreban privremeni smještaj, a iste se kao takve nalaze na evidenciji Centra za socijalni rad Kalesija.

Status korisnika može steći samo osoba čije se stalno mjesto prebivališta nalazi na području općine Kalesija.

#### III

Postupak dodjele stambenog prostora na korištenje se pokreće po zahtjevu korisnika ili po službenoj dužnosti, kao i po inicijativi Centra za socijalni rad Kalesija ili drugog organa.

#### IV

Postupak vodi i rješenje donosi Služba za opće poslove, boračko-invalidsku zaštitu i raseljena lica, koja je dužna, uz punu saradnju Centra za socijalni rad Kalesija i same stranke, utvrditi činjenice i ispitati okolnosti u smislu postojanja uslova za sticanje statusa korisnika stambenog prostora u skladu sa članom 2. stav 1. ove Odluke.

#### V

Služba za opće poslove, boračko-invalidsku zaštitu i raseljena lica općine Kalesija će, u skladu sa odredbama ove Odluke, na osnovu vlastite evidencije, evidencije koja se vodi kod Centra za socijalni rad Kalesija i prispjelih zahtjeva sačiniti listu prioriteta korisnika.



VI

Rješenje kojim se korisniku priznaje pravo na smještaj se izdaje na privremenoj osnovi i to na period od najduže jedne godine.

Rok iz prethodnog stava se može produžiti, ukoliko se status korisnika, koji je imao prije donošenja rješenja o priznavanju prava, nije promijenio.

VII

Za stambeno zbrinjavanje osoba koje će po odredbama ove Odluke steći status korisnika stambenog prostora, općina Kalesija stavlja na raspolaganje objekat stare škole u Mjesnoj zajednici Memići.

VIII

Ova Odluka stupa na snagu danom donošenja i ista će se objaviti u «Službenom glasniku općine Kalesija».

Bosna i Hercegovina  
Federacija Bosne i Hercegovine  
TUZLANSKI KANTON  
OPĆINA KALESIJA  
OPĆINSKO VIJEĆE  
Broj: 01-05-2-603  
Datum, 28.02.2005. godine

PREDSJEDAVAJUĆI  
OPĆINSKOG VIJEĆA  
Hata Mujčinović, dipl. ing. tehn.s.r.

---

# *S a d r Ź a j*

<b>OPĆINSKO VIJEĆE</b>	<b>Strana</b>
14. Odluka o razrješenju i izboru člana radnog tijela Općinskog vijeća .....	13
15. Odluka o izmjenama i dopunama Odluke o organizaciji općinskih službi za upravu .....	13
16. Odluka o općinskim administrativnim taksama .....	14
17. Odluka o izmjenama i dopunama Odluke o građevinskom zemljištu .....	18
18. Odluka o visini naknade za nepriznato uzurpirano zemljište u 2005. godini ...	20
19. Odluka o načinu i uslovima određivanja naknade za eksproprisano zemljište u 2005. godini .....	21
20. Odluka o vodosnabdijevanju na području općine Kalesija .....	22
21. Odluka o vodoprivrednim objektima za zaštitu voda na području općine Kalesija .....	31
22. Odluka o stambenom zbrinjavanju lica koja se nalaze u stanju socijalne potrebe .....	36